

PABOJA ETEHUE CONITO CUIÑAJJIJO BA'E YASIJJE BECANEJJIJJI PEA'AI

2 CORINTIOS

Pabohua tecue ca o'oyanaje Jesosaja epeeji cuana Conitojo ba'e yasijje

1 ¹Eya Pabo, Jesosa Quitoja huoojea'yo oja sohui huohuijji. Jamaya Eyacuiñajjiya a sa acani. Timoteo esejaya epeeji enijje nequi. Eyaya tehueaña miquiana huasijje. E'e, miquiana Jesosaja epeeji cuana Conito cuiñajjiyo ba'e yasijje, ma Acaya meshijo ba'e yasijje cuanaya tehueaña eyaya. ²¡Esejaya Emeshi Mese neiya Jesosa Quitohua, Eyacuiñajjiya, esejaya Chii neiya pea'ai miquianaya cajaahuana neinei cahua; quea bei caba'e mee cahua pea'ai!

Pabo Eyacuiñajji nijje mimiani quea bihui

³¡Eyacuiñajji ejjabihuaqui! E'e, oya esejaya Emeshi Mese nei Jesosa Quitoja Chii, esejaya Chii nei pea'ai poani. Oya esejo jjashahuabaquiiani quea bei. Ohuaya eseya quea bihui nee po mee cani pea'ai. ⁴Eseya quea nee, quea yeno poanijo, ohuaya quea bihui nee po mee cani. Quea bihui nee po majje eseyaya pea cuana quea bihui nee po meeje'yo, yeno'ama pea'ai. Jamaya ejja'aqui ba'a: —Eyacuiñajjiya ecuana jaahuana cani. Oya miquiana jaahuanajji poani pea'ai. Jamajjeya ¡a'a quea yeno pojji!

⁵Jesosa Quito quea nee poanaje dejja mimishi cuaa napa cajje. Eseya onijje jjapeequianijo, pea cuaa eseya napa caje pea'ai. Jamatii, eseya quea bihui nee po mee caje Jesosaa. Majoya eseyaya pea cuana quea bihui nee po meesahuaje Jesosa nijje. ⁶E'e eyaya, Timoteohua pea'ai esohui huohuiaña Jesosajo. Jamajjeya pea cuaa ecuana napa cani. Jamatii, ecuanaja esohui shajja'ajja majje miquianaya Jesosa nijje jjapeequi'yani. Ohuaya miquianaja mimishi cuana cuijea ca'yonaje. Jamajjeya miquianaya quea bei nee poani.

E'e, Jesosaa ojaya epeeji quea ca'a nee po mee canijo, miqianaya quea ca'a nee poaje pea'ai. Jamajjeya pea cuaa miqiana napa cajje Jesosaja epeeji quea ca'a nee poaje tii. Onijje jjapee tiitiquije'yo pea'ai. E'e, Jesosaa miqianaya ojaya epeeji quea ja'a po mee caje'yo ecuaa jayojjaya, quea bei. ⁷Jiquio ecuanajaya eba ba'a: Miqianaya Jesosaja epeeji quea ja'a po tiitiije'yo. E'e, miqianaya ecuaa jayojja poaje. Jesosa nijje jjapeequianijo, pea cuaa napa caje. Jamatii Jesosaa miqianaya quea bei nee po mee caje ecuaa jayojjaya. Jamaya Jesosaa acaje'yo miqianajo, ecuanajo pea'ai.

⁸Epeeji cuana, jjeya ecuaaya huohuije quea nee ecuaa poanaje Asia meshijo nequi miqianajaya ebajji. Jomajo ecuaa ba'enaje quea camaja nee nee, quea mano poanaje. E'e, ecuaa jjashahuabaquinaje jama ba'a: —E'e, ecuanaja quea camaja nee nee Jesosa nijje ejjapeequijji, jiquio meshijo pojja'a mo manoj'e'yo. ⁹E'e, mimishi cuana jjashahuabaquiani ecuaa quecuajji.

Eyacuiñajjiya ecuaa ba mee canaje jama ba'a: Dejja cuanaja ecuaa ejaahuanajji pojjeama. Oya oe nei ecuaa jaahuanajji poani. Ohuaya ohuaye nei emano'yojaa cuana shequi mee ca o'oyani. Jamaya eseya ba mee canaje Eyacuiñajjiya.

¹⁰E'e, mimishi cuaa napa huicha'a huicha'a cajje, ecuaa quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuaa jaahuana ca'yonaje; mano'yo jjima Asia meshijo nequi. Ecuaa jjashahuaba tiitiquiani jama ba'a: —Eyacuiñajjiya ohuaye neiya ecuaa jaahuana tiitii canijo, mano'yo jjima jjeya.

¹¹E'e, miqianaya Eyacuiñajji nijje miminaje ecuaa ojaya ejaahuana tiitijji. Jamajjeya ohuaya miqianaya shajja'ajja canaje onijje mimiani. Ecuaa jaahuana canaje. Jamajjeya quea huiso Jesosaja epeeji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epeeji jaahuanaña quea ja'a nee.

Pabo Conito huasijje poqui jjima poaje

¹²Ecuanaja eba'ejjijo, echacojjijo, ehuohuijjijo pea'ai ecuaaaya quea bihui nee huohuiaña. E'e, miqiana nijje, ojjaña pea cuana nijje nequinajejo pea'ai e'e jojo nei ecuanaja echaco quea pame nee poanaje. Eyacuiñajjiya ecuaa chaco meesahua canaje ojo quea pame nee. Ecuanaja ejjashahuabaquijji quea ja'a nee pea'ai. Dejja cuanaja ejjashahuabaqui'yojji jayojja jama ba'e ajja. Chojja, de. Eyacuiñajjiya ecuaa ba'e meesahua cani ojaya esohui jayojja. ¹³Ecuanaja esohui etehue'yo miqiana huasijje quea ja'a nee. Esohui quea quehua tehue jjima. Eya jjashahuabaquiani jama ba'a: ¹⁴Yahuajo miqianaaya ecuaa ba pishana majje ejjaba'e bamequi'yojji banaje. Quijje quea ja'a nee baje'yo ecuaa ba neinei majje. Jamajjeya Jesosa, Emeshi Mese nei poe o'oyajo, ecuaaya oya huohuije'yo miqiana ojaya epeeji quea pame poanaje. Cuanaya ojaya esohui jayojja ba'yanijo, miqianaaya quea bihui nee ecuanajo huohuije'yo Jesosa poe o'oyajo.

¹⁵E'e, ecuea eba miqianaya jjabahuejjaquije eya esohui jayojja quea ja'a ba'yani. Jamajoya jjeyahua nei eya miqiana que poqui o'oya sa poanaje miqiana Jesusajo quea ja'a nee ba'e meesahua o'oyaa. ¹⁶Yahuajo eya jjashahuabaquinaje jama ba'a: —Jesusaja epeeji cuana Masenonia meshijo ba'e yasijje poquije eya dobiqinanaje Conito cuiñajji yasijje Jesusaja epeeji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jjashahuabaquinaje.

¹⁷Jamatii eya poqui jjima miqiana baa. Miqiana baquijji eya jjashahuabaquinaje quea ja'a nee. Ecuea epoquijji eya jjashahuabaqui ajja pea cuana jayojja jama. Jesusaja epeeji pojjeama cuaa huohui cani jama ba'a: —Eya poquije. Chojja, eya poqui ajja —jamaya eya jjashahuabaqui ajja. Eyaya ecuea ejjashahuabaquijji jayojja jama aje'yo. ¹⁸Eyacuiñajji sijje po ajja, ojaya esohui jayojja jama ohuaya acani. Ojaya eba eya o jayojja e'e nei poani, sijje po ajja jama ba'a: —E'e pojja'a, de —jamaya eya sijje po ajja.

¹⁹Eyaya Sinasi nijjeya, Timoteo nijjeya pea'ai Jesosa Quitoto huohuinaje miqiana huasijje. Oya Eyacuiñajjija Bacua Eja. Ojaya esohui jayojja jama acaje'yo e'e jojo nei, ohuaya. ²⁰Eyacuiñajjija esohui yahuajo quea huiso, quea pame nee nee. Jesosa Quito ese jaahuanaa poeyanaje. Ohuaya ojjaña Eyacuiñajjija esohui yahuajo jayojjaya jama jjeya acaje'yo esejo. Jamajjeya Jesosa Quitohua Eyacuiñajjija esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuana nijje. Ojjaña e'e jojo nei poani. Miya sijje po ajja nei nei —jama bihuameya seya aña.

²¹Eyacuiñajjiya ecuana, miqianaya pea'ai ojaya epeeji po mee canaje. Ohuaya eseya babaca ca'yonaje onijje ejjapeequijji. ²²Jama esejo acanaje ba'a: —Miqianaya ecuea epeeji cuana poani. Ecuea ejjeshe jayojja jama miqianaya —Eyacuiñajji poanaje.

Eyacuiñajjiya ese que hoojea canaje Edojjoshahua Pame ese jaahuanajji. Edojjoshahua Pameya eseya ba mee cani jama ba'a: Quijje eseya quea ja'a nee Jesosa jayojja ba'e tiitiije'yo Eyacuiñajji nijje eyajo.

²³Eyacuiñajjiya ba cani ecuea ejjashahuabaquijji miqianajo quea pame nee poani. Jama poani eya ba'a: —Conito huasijje jjeya epoquiya jjemo eyaya onaya tecueajea'yome pojja'a, quea mimishi ba'yanijo. ²⁴Eya miqianajaya emeshi mese pojjeama, miqiana hoojea neinei'yojji pojjeama. Eyaya ca ca esohui huohuiaña, Jesusaja esohui, miqiana quea bihui nee po meeji. E'e, Jesusaja esohui jayojja jama añajo, ojaya epeeji quea ja'a nee poaje'yo miqianaya.

2 ¹Jjeya eya jama jjashahuabaquiani ba'a: —Jjeya Jesusaja epeeji Conitojo ba'e beca cuana quea mimishi poanijo, eya poqui ajja jocuama o tecueaa. Jjabahuejjaqui o'oyajo, quea yeno poaje o'oya oya cuana —eya poani.

²E'e, miqianaya eyaya quea yeno po mee majje, ¿ajeo acuae che eya quea bihui po'yome? ³Jamajjeya yahuajo eyaya miqianaya tehuenaje quea tecue mimishi

pajea mee'yojji. E'e, miqiana quea mimishi poanijo, eya quea yeno poanaje. Pea chama' e quea bihui nee po meeji. Eya jjashahuabaquinaje miqianajo jama ba'a: —E'e jojo nei ohuaya Eyacuiñajji esohui jayojja jama acaje'yo. Majoya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

⁴E'e, eyaya quea yeno nee esohui quea tecue tehuenaje miqiana jjabahuejjaqui mee'yojji. Quea camaja esohui quea tecue etehueji. Miqianaya quea yeno po mee sa po'yo ajja. Chojja. Eya jjashahuabaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea nee nee poani —eya poani. E'e, jamaya ecuea ejjashahuabaquijji miqianajo.

**Jesosaja epeeji quea mimishi tecuea majje ja'a quea
tecue po tiitijji onijje ohua mimishi pajea cajo!**

⁵Jesosaja epeeji miqiana nijje nequi ca ca oe quea mimishi poanaje. Eya quea yeno nee poanaje ojo. Miqianaya quea yeno poanaje pea'ai ojo. Jamajjeya eyaya o jjabahuejja meequijji tehuenaje oja mimishi cuana pajea mee'yojji.

⁶Beshahua nei miqianaaya, ojjaña oya jjabahuejjaqui meenaje ojaya mimishi epajea'yojji. Apoa. ⁷Jamajjeya ja'a oya quea yeno po tiiti meeji! ja'a oya tecuea tiitijji! Chojja. Quea yeno nee nee po tiiti majje oya Jesosa nijje japeequi pajea'yo chana! Jjabahuejjaqui'ajjo, jonijje japeequi'yocue quea pame nee! ⁸E'e, oya jama huohuicue ba'a: —Miya ecuanaja quea boti nee, epeeji —jamaya oya acue.

⁹Yahuajo eyaya ma esohui tehuenaje miqiana ba'ajjaji so'o. Eya ba sa poanaje jama ba'a: —¿Ja'a shajjama' poaje? ¿Ja'a ecuea esohui jayojja jama poaje? —poanaje.

Jamajjeya eyaya esohui tehuenaje miqiana huasijje ma dejja quea mimishi jjabahuejjaqui mee'yojji. Miqianaya ecuea esohui etehue'yo jayojja jama po'yonaje. Quea pame. Apoa poanaje. ¹⁰Jamajjeya miqianaya ma dejja quea mimishi poani nijje quene'ama poajo, eya onijje quene'ama poaje'yo pea'ai. E'e, ecuea aje ojaya mimishi epajea'yo pea'ai. Eya Jesosa Quitoja esohui huohuijji poanijo ma dejja mimishi nijje quea tecue poanaje. Jjeya ma dejja nijje tecue'ama poanaje. Jamajjeya imiqianaya pea'ai quea bei, quea ja'a pocue! ¹¹Eseya quea bei, quea ja'a poanijo, Edosiquiaa eseya edasijji pojjeama. E'e, esejaya eba Edosiquianaja ejjashahuabaquijji. Oya aje oe edasijji poani, de, Jesosaja epeeji cuana quea mimishi po mee o'oya sa acani.

Jesosaja ehuhui eyacua

¹²Yahuajo pishana eya poquinaje Toasa cuiñajji yasijje esohui quea pame Jesosa Quitoja huohuiya. Jomajo esejaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee. ¹³Jamatii ecuea epeeji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuabaquinaje. Jamajjeya eya Toasajo ba'e nijje miminaje jama ba'a: —Poquia iña Tito sa'ajjaa.

Majoya eya poquinaje Masenonia meshi yasijje.

¹⁴Eseyaya Eyacuiñajji bihuiña. Ohuaya eseya quea ja'a nee nequi mee cani. E'e, ohuaya eseya dejja mimishi cuana mimicuijjeanobiajea meesahua cani; eseya Jesosa Quito nijje jjapeequi mee cani quea ja'a nee. Ohuaya ecua huohui meesahua cani ojjaña meshijo Jesosa Quitoja esohui. Ma esohui quea pame nee nee. Jiquio ecua shiyeshiye esejaya quea boti nee aña jama jayojjaya Jesosaja esohui ecuanajaya quea boti nee.

¹⁵E'e, Eyacuiñajjiya ecua huoojea ca'yonaje Jesosa Quitojo huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeeji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitiije'yohua pea'ai ba caje'yo Eyacuiñajji quea pame nee: —E'e Eyacuiñajji, miya quea pame nee nee. Pea chama' mi jayojja —oya bihuijaje eseyaya.

¹⁶E'e, Jesosa Quitoja esohui shajja'ajja majje ojjaña mimishi cuana jjabaquije oya cuana cajaa'ya'yo, quea nee nee poaje'yo cuaquijo. Ma esohui shajja'ajja majje Jesosaja epeeji cuana ca ca jjabaquije oya cuana ba'e tiitiije'yo quea ja'a nee eyajo Eyacuiñajji nijje. ¹⁷¿Aya acuae maya esohui eyacua Jesosajo huohui caje pea cuana huasijje, de? Ma esohui quea pame Jesosa Quitojo ecua huoojea majje sohuihuohui meesahua caje quea ja'a nee, ohuaya. Pea cuaa Eyacuiñajji esohui huohui cani bejjo sosejje. Ecua, chojja. Ecuaaya, Jesosaja epeeji poaniya quea bihui nee huohuiña e'e jojo nei. Ecuanaja eba jama ba'a: E'e jojo nei Eyacuiñajjiya ecua huoojea ca'yonaje ojaya esohui huohuiya.

Jesosa nijje chaco cani esohui eyacuajo

3 ¹E'e, Eyacuiñajjiya ecua huoojea ca'yonaje miqiana huasijje ojaya esohui huohuiya. Pea cuaa miqiana que quia ca'yonaje esohui peaja tehue'yo jama ba'a: “¡Jiquio dejja Jesosaja epeeji e'e jojo nei! ¡Jamajjeya oya cuana shajja'ajjacue!” Ecuanaja ca ca peaja tehue'yo equiajji pojjeama miqiana que jama ba'a: “¡Pabo quea pame nee; oya shajja'ajjacue!” Chojja. Ecua miqianajaya eba Eyacuiñajjiya huoojea'yo. ²Ecua jama jjashahuabaquiani ba'a: —Ojjaña ba cani ecuanajaya esohui shajja'ajja majje Jesosaja epeeji quea pame nee poanaje miqianaya, Conitojo ba'e cuana.

Jamajjeya ecua e'e jojo nei Eyacuiñajjiya huoojea'yo ojaya esohui huohuijji ojjañaja eba, de. Jamajjeya esohui mi tehue mee cani jama ba'a: “Pabo quea pame nee, Eyacuiñajjiya huoojea'yo”.

³E'e, ojjaña ba cani miqianaya Jesosaja epeeji cuana poanaje ecuanaja esohui shajja'ajja majje. Edojjoshahua Pameya miqianaya Jesosa nijje jjapeequi meesahua ca'yonaje. Yahuajo nei Eyacuiñajjiya esohui mei beje biajje tehue majje ojjaña ba mee ca poa etiiquiana Moisesi oja huoojea'yo. Jjeya ca ca Eyacuiñajjiya Edojjoshahua Pameya miqianaya Jesosa Quito nijje

jjapeequi meesahua ca'yonaje ecuea esohui miquiana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuijji.

⁴Ecuanajaya eba Eyacuiñajjiya ecuana Jesusaja epeeji quea ja'a nee po mee majje huoojea canaje miquiana huasijje esohui huohuiya. ⁵Jamajjeya jama jjashahuabaquiani ecuana ba'a: —¿A'a ecuana quea pame nee poanijo, quea sapa ja'a poanijo esohui huohuije quea ja'a nee? Chojja. Eyacuiñajjiya ecuana esohui huohui meesahua canijo ca ca quea ja'a nee poani ecuanaja esohui —jamaya ecuana jjashahuabaquiani.

⁶E'e, Eyacuiñajjiya ecuana huohui meesahua cani ojaya esohui eyacua Jesusajo. Etiiquianaja esohui jayojja jama pojjeama ecuanajaya esohui; eyacua. Ecuanajaya etiiquiana Moisesija esohui yahuajo nei etehue'yojo ojjaña ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caje'yo tii tii; Eyacuiñajji nijje eba'e'yojji pojjeama.

Jjeya ca ca ecuaaya huohuiaña jama ba'a: —Mano'yajo, Edojjoshahua Pameya Jesusaja epeeji cuana ba'e tiitii mee caje'yo —ecuana poani.

⁷E'e, yahuajo nei Moisesiya ojjaña jama tehueme aca poa ba'a: “Eseya quea mimishi poajo, Eyacuiñajjiya quea nee nee po mee caje'yo tii tii cuaquijo”. Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijiji jayojja poa esohui quea pamejojo. Jamajjeya Isaeni cuaa Moisesija ecojja ba jjima aca poa quea siyo nee neejojjo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa. ⁸¿Ajea esohui quea pame nee nee po tiitiije? ¿A'a Moisesija pojja'a? ¿A'a Edojjoshahua Pameja? Edojjoshahua Pameya eseya ba'e tiitii mee canijo quea pame nee; e'e, Moisesija iye bame bame. ⁹¡Bacue! Moisesija esohui etehue'yo quea pame pishana ojjaña cuaa ba canaje jama ba'a: Eseya quea mimishi poajo, Eyacuiñajjiya quea nee nee po mee caje'yo tii tii.

Edojjoshahua Pameya ca ca eseya Eyacuiñajjiya epeeji mimishi'ama po mee cani. Quea pame nee nee Edojjoshahua Pameya eseya acani. ¹⁰Yahuajo nei Moisesija etehue'yojo ojjaña jjashahuabaquinaje ojaya esohui etehue'yo quea pameya poa. Jjeya pea ejjashahuabaquijji yani. Jjeya ca ca esohui quea pame nee eba'e tiitiijji ecuanajaya eba. Quea pame nee nee esohui eyacua poani. ¹¹E'e, yahuajo nei ojaya esohui etehue'yo quea pame neejojjo Moisesi ma esohui tehue majje quea cojja jiji poa, quea cojja jiji nee epo tiitiijji pojjeama. Jjeya ca ca esohui eyacua quea ja'a capo tiitii'yahua. E'e, ecuana ba'e tiitii mee caje'yo quea pame nee nee epo tiitiijji.

¹²E'e, ecuanajaya eba Edojjoshahua Pameya ecuana ba'e tiitii mee caje'yo. Jamajoya ma esohui eyacua huohui tiitiiña bicho'ama. ¹³Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoqui'ya poa Isaeni cuana mete'ama epojji. Ecuanaya ca ca Moisesi jama pojjeama. Esohui eyacua eba'e tiitiijji nahue ajja; huohui

majamajaña ojjañaja ebajji. ¹⁴E'e, yahuajo Isaeni cuaa Moisesija esohui etehue'yo shajja'ajja majje jamatii eba'e tiitii'yoyji ba meeme ajja poa. Esohui eyacua onajaya quea quehua poa. Ejjacojja dodoqui jayoyja oya poa. Jesosa Quitoja epeeji nei poanijo ca ca ohuaya esohui eyacua eba'e tiitii'yoyji ba mee cani. ¹⁵Jjeya nei pea'ai Isaeni cuaa Moisesija esohui etehue'yo shajja'ajja canijo esohui eyacua eba'e tiitii'yoyji onajaya quea quehua. ¹⁶Jamatii ojjaña joya Jesosa Quito nije jjapeequiani ohuaya esohui eyacua ba mee caje'yo quea ja'a nee. ¹⁷E'e, jamaya poaje Edojjoshahua Pameya, Jesosa Quitohua pea'ai eseya ba mee caje quea ja'a nee Eyacuiñajjiija ejjashahuabaquiji. Ma ba majje esohui eyacua esejaya quea ja'a nee poaje. Jamajjeya Jesosa nije jjapeequi'yaajo, ohuaya eseya ba'e tiitii mee caje'yo onijje, Moisesija esohui amajje pojjeama. ¹⁸Jesosaja epeeji cuana poanijo eseya jjacojja paaqui jjima jayoyja jama. E'e, ojjaña ba meeje Eyacuiñajjiya eseya Jesosa jayoyja jama atiitii meesahua cani. Jamajjeya Edojjoshahua Pameya eseya eyamijo aniya quea ja'a nee jjashahuabaqui mee cani. Jesosa jayoyjaya popoqui mee cani eseya.

Pabohua esohui huohui cani quea ja'a nee eba'e meesahuajji

4 ¹Eyacuiñajji ecuana nije quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huoojea ca'yonaje ojaya esohui eyacua Jesusajo huohuiya. Jamajjeya ecuaaya quea ja'a nee huohuiaña yeno'ama, mete'ama. ²E'e, ma esohui Jesusajo huohuiañaajo quea mimishi ba'e'yo ajja. Quea mimishi jjashahuabaqui ajja pea'ai. Edasiajji cuana pojjeama. Ecuana esohui Jesusajo e'e jojo nei poani. Jamaya Eyacuiñajjiija eba. Jamajjeya ecuanaja esohui e'e jojo nei poanijo, ojjaña jjashahuabaquije jama ba'a: —E'e, jiquio esohui huohuiiji cuanaja esohui e'e jojo nei poanijo, eyaya shajja'ajjaje. Oya cuana edasiajji cuana pojjeama.

³Ecuaya Eyacuiñajjiija esohui e'e nei huohui tiitiiña. Jamatii beca cuanaja, Edosiquiana nije jjapeequianija Jesusaja esohui quea quehua. Oya cuana aje oe quea nee nee poaje'yo tii tii. ⁴Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii dejja mimishi cuana onijje jjapeequi sa po ajja. Oya cuana aje oe cojjama' jayoyja, de. Jamajjeya Edosiquiana neiya, ma ojjaña dasiajji poaniya oya cuana dasia cani esohui quea pame nee nee Jesusajo ojaya ebajji pojjeama. ⁵Joya ecuaaya sohuihuohuiaña miquianajaya e bihuijji pojjeama. Chojja. Ecuaya huohuiaña jama ba'a: —Ecuana miquiana ba meesahuajji poani. Jesosa Quito ca ca Emeshi Mese nei poani. Jamajjeya ¡Jesusa bihuiaque miquianaaya! —ecuanaya miquiana niñeshe'ajji poani.

⁶¡Bacue! Yahuajo nei meshi pana jjimahuajo Eyacuiñajjiya jama huohuime aca poa ba'a: “Quea misi, ¡quea ja'a nee oe po'yocue!” aca poa; jjaja'aqui mee ca'ya poa. Jjeya ohuaya tiya eseya Jesusajo jjashahuabaqui

meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pea'ai.

Ona Jesosa nijje jjapee meesahuaquiañajo ba'e tiitiije'yo

⁷Eyacuiñajjiya ecuana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epeejji quea ca'a nee acanijo, ojjaña ba cani jama ba'a: —E'e de, Eyacuiñajjiya quea ca'a neeya Jesusaja epeejji cuana quea ca'a nee o jayojja jama po mee cani. Ojjaña huasijje esohui quea pame nee huohui meesahua cani.

⁸Mimishi cuaa ecuana napa cani. Jamatii ecuana ejeabichajea'yojji pojjeama. Pea cuana quea mimishi poanijo, quea camaja tii ecuanaja eba'ejji. Jamatii quea yeno nee nee pojjeama ecuana poani. ⁹Mimishi cuaa napa cani Jesusaja esohui ehuhui poaje jjejojo. Jamatii Eyacuiñajjiya ecuana ejeana'yojji pojjeama. Pea cuaa cuiajea cajo, jamatii ecuana mano'yo ajja. ¹⁰Jesosa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuana acaje'yo pea'ai pojja'a Jesosa nijje jjapeequianijo. Jamajjeya ojjaña jama acaje ba'a: —E'e jojo nei Jesusaa jiquio dejja cuana ojaya epeejji nei po tiitii mee cani. Mimishi cuaa napa cajje jamatii esohui huohui pajea jjima acani.

¹¹E'e, pea cuaa ecuana napa majamaja cani Jesosa nijje jjapeequianijo. Ecuana quecua sa acani pea'ai. Jamatii ecuana quea ja'a nee po tiitiiianijo, ojjaña ba caje Jesosa ecuana jaahuanajji quea ja'a nee. Oya eshe, de. ¹²E'e, mimishi cuaa ecuana quea nee nee po mee cani esohui Jesusaja huohuiañajo. Jamatii ecuanaja esohui shajja'ajja majje miquianaya Jesusaja epeejji poanaje. Jamajjeya ohuaya miquianajaya mimishi cuana cuijea'yo majje ba'e tiitii mee caje'yo.

¹³Yahuajo Eyacuiñajjiya esohui huohuijjiya Dabiya huohui ca poa jama ba'a: “Ecuea eba e'e jojo nei Eyacuiñajji e jaahuanajji poani. Jamajjeya jamaya eyaya huohuiaña” Dabiya aca poa. Jjeya ecuana Dabi jayojja Eyacuiñajji nijje jjapeequiani. Ecuanaja eba e'e jojo nei Eyacuiñajjiya ecuana jaahuana cani. Jamajjeya ecuaaya esohui huohui tiitiiña jamatii mimishi cuaa napa cani tiiya. Jama poani ba'a: ¹⁴—Emeshi Mese nei Jesosa mano'yajo, Eyacuiñajjiya oya shequi mee ca'yonaje. Jamaya ecuana mano'yajo, e'e jojo nei Eyacuiñajjiya ecuana shequi mee caje'yo. Ohuaya ecuanaya, miquianaya pea'ai nequi tiitii mee caje'yo Jesosa nijje eyajo —ecuaaya año.

¹⁵E'e, quea camaja poani ecuana Jesusaja esohui huohuiañajo. Jamatii ecuanaja esohui ba majje miquianaya Jesosa nijje jjapeequinaje.

Jamajjeya Eyacuiñajjiya miquiánaya ba'e tiitii mee cani. Pea cuana quea huiso Jesosa nijje jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama ba'a: —Eyacuiñajji quea pame nee nee poani. Quea ca'a nee nee poani pea'ai —acaje ojjaña.

¹⁶Jamajjeya ecuaaya maya esohui Jesusajo huohui pajea'yo ajja. Chojja. Onaa napa cajje ecuana quea nee nee poani. Edejja tii cuana jayojja jama ca'a'ama poaje. Jamatii Eyacuiñajjiya ecuanaja edojjoshahua cuana quea ja'a po tiitii mee cani. ¹⁷Jjeya onaa napa cajje ecuana quea nee poani Jesosa nijje jjapeequianijo. Quea nee po tiitii'yo ajja. E'e, jjeya quea nee poani. Jamatii Jesosa nijje jjapeequianijo, quijje ohuaya ecuana ba'e tiitii mee caje'yo quea pame nee nee eyajo onijje. Quea nee popajeaje'yo. Jamaya quea pame nee nee. ¹⁸Jjeya nei ecuaaya Jesosa ba jjima aña ecojjaa. Jamatii ecuana jjashahuabaquiani Jesosa nijje eyajo eba'e'yojji. Jiquio meshijo eba'ejji ecuana jjashahuabaqui ajja. Jiquiojo ba'e tiitii ajja. Eyajo Jesosa nijje ca ca oe ba'e tiitiije'yo.

Eba'ejji quea pame nee eyajo

5 ¹Ecuaya jama baña ba'a: Eseyá mano'yajo Eyacuiñajjiya eyacua pana caje'yo esejaya eyami. Eyami eyacua ani tiitiije'yo eyajo. E'e, eseya jiquio meshijo ba'yanijo ca'a'ama. Eyajo ba'e'yo majje quea ca'a nee eseya poaje'yo tii tii. ²Eseyaya jjeya nei ishooña eyami eyacua. Cuanaya eseya jiquio meshijo ba'yanijo quea nee nee poani. Jamajjeya jjashahuabaquiani jama ba'a: —Eya poqui sa poani eyahuasijje. Jomajo ecuea eyami eyacua poaje'yo.

³Jesosa poe o'oyajo, jiquio eyami eyacua poaje. Jiquio ecua jjapipi eyacua poani jama jayojja esejaya eyami eyacua poaje'yo. E'e, eseya jjashahuabaquiani eyami eyacuajo. Quea pame nee poaje. ⁴Jiquio meshijo ba'yanijo eseya quea nee nee poani. Quea camaja nee jiquiojo eba'ejji. Eseyaya eyami ca'a'ama, jjapipi jjacocoqui jjima jama. Jjacocoqui sa poani. E'e, eseya poqui sa poani eyahuasijje. Jomajo eyami eyacua sa poani. Jiquiojo manoj'e'yo. Eyacua po majje ca ca eseya ani tiitiije'yo eyajo.

⁵Eyacuiñajjiya eseya ba'e tiitii mee cani; esejaya eyami eyacua aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseya ba mee cani jama ba'a: E'e jojo nei Jesusaja epeeji poanijo ohuaya ecuana eyami eyacua quia caje'yo; ani tiitii mee caje'yo onijje eyajo.

⁶⁻⁷Jamajjeya jjashahuabaquiani jama ba'a: —E'e, Eyacuiñajjiya eseya ba'e tiitii mee caje'yo onijje. Eseyá jiquio meshijo ba'yanijo Jesosa cojja neijo ani ajja. Eseyaya eyami eyacua po majje Jesosa nijje ani tiitiije'yo. Jjeya Jesosa esejaya ecojjaja ba jjima; jjaba meequi ajja. Jamatii eseya jjashahuabaqui mee cani onijje enequi tiitii'yojji. Jiquio meshijo aquiana cuana quea huiso baña ecojjaa. Jamatii ma aquiana cuanaajo jjashahuaba neineiqui ajja. ⁸E'e jojo nei baña Eyacuiñajjiya

eseya ba'e tiitii mee caje'yo. Jamajjeya mete'ama, quea bei nee poani. Poqui sa poani Jesosa nijje eba'e tiitii'yojji, Emeshi Mese nei nijje. Ishoaña esejaya eyami eyacua. ⁹Jamajjeya jjeya nei eseja Jesosaja esohui jayojja jama atiitii sa poani jiquio meshijo ba'yanijo. Quijje pea'ai eyajo onijje ani tiitije'yo. Jamaya sa poani. ¹⁰E'e, eseja eba jama ba'a: Jesosa Quitoña eyajo ojjaña huoojeajji poanijo ojjaña meshijo ba'ya poa nequi mee caje o cojja nejjo. Ojjaña quea mimishi poanaje ohuaya quea nee nee po tiitii mee caje'yo. Ojjaña quea pame poanaje ca ca quea bihui nee nee po tiitii mee caje'yo. Jamaya eseyaya baña.

Jesosaa ecuana sohuihuohui mee cani ona onijje ejjapeequijji

¹¹E'e, Jesosaa, Emeshi Mese neiya ojjaña quea mimishi poani quea nee nee po mee caje'yo tii tii. Quea tecue nee nee poaje ojjaña quea mimishi poani nijje. Jamajjeya ecuaya ojjaña dejja cuana huohuíaña jama ba'a: —¡Jesosaja epeeji pocue! ¡Miquea mimishi cuana pajea'yocue!

Eyacuinajjija eba ecuana ojaya epeeji poani. Ecuana esohui e'e jojo nei poani, siajje pojjeama. Jamaya ojaya eba pea'ai.

Ecuana jjashahuabaquiani jama ba'a: —Ojjaña Conitojo ba'ejja eba esohui e'e nei ecuaya huohuíaña.

¹²Jamajjeya ecuana miquiana nijje jama po ajja ba'a: —¡Ecuana bihuiaque quea pame poanijo! —chojja, jamaya ecuana po ajja. Jiquio jama ecuana a sa poani ba'a: Ecuaya huohui tiitiaña eyacua eba'e'yojji Jesosa nijje eyajo.

Jamajjeya miquianaaya esohui huohuijji nisho huohuicue quea ja'a nee jama ba'a: —Miquianaaya ca ca oe niñebaña Pabo, esohui huohuijji nei. Miya janobajjima nei mimianijo quea pame esohui huohuijji poso jjabaquiani. Jamatii quea ja'a ba'e ajja. ¡Jesosa Quitojo oe quea ja'a nee jjashahuabaquicue! ¡Quea pame a'yocue! —jamaya esohui huohuijji nisho acue.

¹³Ecuana esohui quea pame Jesosajo, eba'e'yojji eyacuajo pea'ai shajja'ajja majje beca cuana siajje poani jama ba'a: —Pabo niñepoqui, de, ojaya epeeji cuana pea'ai niñepoqui —siajje poani.

Eyacuinajjii nijje chaco tiitiaña, onaaya ecuana niñepoqui poso acani. Jamatii ecuaya chaco tiitiaña Jesosaja esohui quea ja'a nee miquianajaya ebajji. ¹⁴Jesosa Quito ecuana quea jea nee poanijo esohui e'e nei huohuíaña. E'e jojo nei ojjaña mimishi acanijo mano tiitije'yo. Jesosa mano'yonaje ojjaña jama mimishi cuijea'yojji, ojjaña cuaqui yasijje epoquijji pojjeamajo. Jamaya ecuana eba nei nei. ¹⁵E'e, Jesosa mano'yonaje ojaya epeeji mimishi cuijea'yojji. Mano'yajo, Eyacuinajjiya oya shequi mee ca o'oyanaje. Jamajjeya ojaya esohui jayojjaya ca'a cahua! ¡Yahuajo ejjashahuabaquijji capajea ca'yahua! ¹⁶Jesosaja epeeji cuana po jjimahua ecuana pea cuanao jjashahuabaquinaje quea tai dejja mimishi jama. Jjeya, cho. Jjeya ecuana ejjashahuabaquijji pea cuanao Jesosaja ejjashahuabaquijji jayojja jama quea ja'a nee poani. Ojaya epeeji cuana po jjimahua ecuana Jesosa Quitojo jjashahuabaquinaje quea tai dejja mimishi jama. Jjeya, cho. ¹⁷Jamajjeya Jesosa Quito nijje jjapeequianijo, ohuaya eseja

pea jashahuabaquime po mee cani. Eseyaya ejjashahuabaquijji eyacua quea ja'a nee po mee cani. Jesosa Quito ba jjimahuajo ba'ya poa jayojja po'yo ajja. Jjeya eseya pea jashahuabaqui'yome poani Jesosa jayojja.

¹⁸Eyacuiñajjiya Jesosa Quito huoojea canaje esejo mano'yohua. Jesosa mano'yajo, Eyacuiñajji ese nijje quea quene po tiiti ajja. Ese nijje quea bei po'yo majje ohuaya eseya huoojea canaje ojjaña huasijje ojaya esohui huohuiya jama ba'a: —Eyacuiñajjiya Jesosa huoojea canaje eseja mimishijo mano'yohua. Jamajjeya Eyacuiñajji ese nijje quea quene po tiiti ajja. ¡Jesosa nijje jjapeequicue! ¹⁹E'e, ohuaya Jesosa Quito huoojea canaje ojjañaja mimishijo mano'yohua. Jamajjeya Eyacuiñajji ojjaña ese nijje quea bei poani. Quea quene jashahuaba tiitiqui ajja esejaya mimishi cuanajo —jamaya Eyacuiñajjiya eseya huohui meesahua cani.

E'e, jjeya Eyacuiñajjiya ecuana huoojea canaje jama huohuime aa ba'a: —Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Ojaya epeeji cuana pocue!

²⁰E'e, ecuana Jesosa Quitoja esohui huohuijji poani. Ohuaya ecuana huoojea canaje onijje chacohua. E'e, Eyacuiñajjiya ecuana huoojea canaje ojaya esohui huohuiya miquiana huasijje. Jamajjeya ecuaaya esohui huohuiaña miquianaya Jesosaja epeeji epo meejji. Jama aña ba'a: —¡Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Jesosaja epeeji pocue, Eyacuiñajjiya pea'ai! —ecuana poani.

²¹Jesosa Quito quea pame po tiitiinaje mimishi'ama nei. Jamatii Eyacuiñajjiya jama acanaje ba'a: —Ojjañaja mimishi cuana Jesosa Quitoja poaje. Jiquio ecua miquianaaya aquiana aboña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa tiiti'yojji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: —Ojjaña Jesosa nijje jjapeequiani eyaya baña ecuea epeeji, shajjama' pojjeama —Eyacuiñajji poanaje.

6 ¹E'e, ecuaaya Eyacuiñajji nijjeya ojjaña huasijje esohui quea pame nee Jesosajo huohuiaña. Jamajjeya ecuaaya miquiana huohui neineaña jama ba'a: —¡Eyacuiñajjiya esohui shajja'ajja majje jamaya pocue! ¡A'a shajjama' pojji! Shajjama' cuana eba'e meejji pojjeama eyajo Jesosa nijje.

²¡Eyacuiñajjiya esohui shajja'ajjacue! Yahuajo nei nei ohuaya tehue mee ca poa jama ba'a:

“Jjeya nei miquianaya enijje mimiani miquiana mimishi cuijea'yojji.

Eyaya miquianaya shajja'ajjanaje. Enijje mimianijo, eyaya miquianaya ba'e tiiti meejje'yo pea'ai”.

Jamaya Eyacuiñajjiya esohui yahuajo nei etehue'yo poa.

¡Bacue oe! Jjeyahua nei Eyacuiñajji miquiana shajja'ajja sa poani. Jjeya nei ohuaya miquianaya ba'e tiiti mee sa acani ojaya epeeji nei nei epojji.

Pabo quea nee nee poanaje

³Ecuaya Jesosaja esohui jayojja jama atiitiaña quea ja'a nee. Jamajjeya ojjañaá ecuana ba majje Jesosaja esohui shajja'ajja caje'yo. Jamaya ameemee ajja ba'a: —E'e de, Jesosaja epeeji cuana quea mimishi nee poani. Jamajjeya ecuana ojaya epeeji po sa po ajja —jama sijje pomeya epojji pojjeama.

⁴Chojja. Ecuana ba majje ojjañaá caba cahua ecuana Eyacuiñajjijo quea pame nee chacochoani jamatii onaa napa caniya tii. Quea pame nee po titiiani.

E'e, onaaya ecuana quea nee po mee cani, ecuana niñeba cani, Jesosa nijje jjapeequianijo eba'ejji quea camaja poani pea cuana quea mimishi poanijo.

⁵Maaya ecuana cuia majamaja canaje, jeanobiajea majamaja canaje, ecuana nijje quea quene nee po majje quea huiso jjachichaquinaje. Ecuana cojja neijo nequi majje janobajjima mimipanajjinaje. Ecuana quea camaja chacochocho majje cahui jjima tii aninaje. Quea shoe po majamajanaje pea'ai. Jamatii

ecuaaaya esohui quea pame Jesosajo huohui majamajaña, huea'ama nei nei ecuana poani. ⁶Mimishi'ama nei nei ba'yani pea'ai. E'e, ecuana chacochochoani

Jesosajo quea pame nee. Quea huiso esohui Jesosaja ecuanaja eba quea ja'a nee. Ecuana quenequene cuaji ajja pea cuana nijje. Quea bei poani. Dejja tai'ama

poani. Edojjoshahua Pameya quea pame nee ameesahua cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjañaá ba cani ecuana

Jesosa Quitoja echacojji quea ja'a nee. ⁷Ecuanaja esohui e'e jojo nei poani. Eyacuiñajjiya huohui meesahua canijo ecuanaja esohui quea ja'a nee poani.

Eyacuiñajjija emimishi cuijea'yo jjejojo ecuana ba'yani quea ja'a. Jamajjeya ecuaaya eshahuaja epeeji cuana mimicuijjeanobiajeaña esohui e'e nei mimi

majje. Eyacuiñajjiya ameesahua canijo esohui e'e nei mimiani tii. ⁸Cuanaya eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesosaja esohui huohuijjijjojo.

Pea cuana ca ca jama poani ba'a: —Pabaja esohui quea ja'a nee.

Beca cuana ca jama poani ba'a: —Chojja, Pabaja esohui shajja'ajja sa po ajja ca iña.

Pea cuaa ca jama saja'ame acani ba'a: —Pabo Eyacuiñajjija esohui huohuijji quea ja'a nee.

—Chojja, Pabo esohui huohuijji nisho. Oya sijje pojji —jama eya niñebameya acani cuaa.

⁹—Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñeba majje eya cuia canaje cuaa. Jamatii Eyacuiñajjiya jaahuana canaje jjejojo eya

mano'yo jjima. ¹⁰Quea huiso epeeji nisho poanajejo, eya quea yeno poani.

Jamatii Eyacuiñajjiya eya quea bihui nee po mee cani. Eya aema' poanaje pea'ai. Jamatii ecuea esohui shajja'ajja majje quea huiso Jesusaja epeeji poani, quea pame ba'yani. E'e, Jesusaja epeeji poanijo eseya quea aquiana huiso nee nee jayojja. Jiquio meshijo ba'yanijo ca ca eya e'aquiana mese pojjeama. Jamatii Jesusaja epeeji poanijo ecuea quea huiso aquiana yani eyajo.

¹¹ Ecuea epeeji cuana Conitojo ba'e, eyaya ojjaña ecuea ejjashahuabaquijji huohuiaña quea ja'a nee miqiana huasijje miqianaya ecuea quea jea nee nee poanijo. ¹² E'e, miqiana nijje jjapee neineiquiani, miqiana quea jea nee nee poanijo. Miqianaya ca ca enijje jjapee neineiqui sa po'yo ajja. ¹³ Jamajjeya epeeji cuana, ecuea esohui miqiana huasijje jama ba'a: —¡Jiquio ecua miya ecuea quea jea nee nee jamaya oe eya acue miqiaaya! ¡Enijje jjapee neineiquicue! —eya poani.

¡Dejja mimishi nijje a'a jjapee neineiquijji!

¹⁴ Miqianaya Jesusaja epeeji cuana poanijo ja'a nequijji Jesusaja epeeji pojjeama cuana nijje! ¡Ojaya epeeji cuana jayojja a'a pojji! Jesusaja ejjashahuabaquijji Edosiquiana neija ejjashahuabaquijji jama pojjeama. Pea oya, de. Jesusaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesusaja epeeji Edosiquianaja epeeji nijje. Pea oya, de. ¹⁵ Jesosa Quitoja ejjashahuabaquijji quea pame nee nee. Edosiquianaja ca ca quea tai. Pea ojaya, de. Jesosa Quitoja epeeji cuanaja ejjashahuabaquijji quea pame. Ojaya epeeji pojjeama cuanaja ejjashahuabaquijji ca ca quea tai. Pea ojaya, de. ¹⁶ Eyacuiñajji equi yasijje Jesusaja epeeji cuana dobiquiani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesusaja epeeji cuana huasijje Eyacuiñajji dobiquinaje. Jamajjeya eshahuaja epeeji cuana nijje jjapeequi meeme ajja. Yahuajo nei Eyacuiñajjiya esohui huohui mee ca poa ojaya epeeji cuana huasijje jama ba'a:

“Miqianaya ecuea huapa pojjeama cuana poanijo, eya miqiana huasijje dobiquiani, miqiana nijje jjapee tiitiquiani pea'ai. E'e, eya oe nei miquea Eyacuiñajji. Miqianaya jaahuana tiitiaña pea'ai. Miqiana ecuea epeeji cuana poani”.

Jamaya pea esohui etehue'yo poa pea'ai ba'a:

¹⁷ “Jamajjeya ¡ecuea epeeji pojjeama cuana nijje a'a jjapee tiitiquijji! ¡Enijje nei oe jjapee tiitiquicue! ¡A'a quea mimishi pojji! Jamajjeya eyaya miqianaya ba'e meeje'yo enijje. ¹⁸ Cuanaya eya miqianajaya Chii nei poaje. Miqianaya ecuea ebacua piona cuana, ecuea ebacua eja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuajo nei huohui ca poa.

7 ¹ Ecuea epeeji cuana, ¡shajja'ajjacue mo! Eyacuiñajjiya jiquio esohui huohui canaje esejaya ebajji, ese jaahuanajji poaniya. Jamajjeya ja'a quea mimishi ba'ejji; a'a quea mimishi jjashahuabaquijji pea'ai!

Miquianajaya eba Eyacuiñajjiya ojjaña mimishi cuana quea nee nee po mee caje'yo tii tii. Jamajjeya ¡quea pame nee nee oe acue! ¡Eyacuiñajjiya ejjashahuabaquijji jama oe pocue! ¡Oya oe shajja'ajjacue!

Pabo quea bihui nee poanaje

²¡Eya quea jea nee acue! Eyaya miquianaya quea pame nee a'yonaje. Ecuea esohui quea pame poanijojoya miquianaya quea pame nee nee po meeje'yo. E'e, miquianaya ecuea edasijji pojjeama. ³Eyaya jiquio esohui huohuiaña miquiana tecueajji pojjeama. Chojja. Yahuajo eyaya huohuinaje jama ba'a: —Miquianaya ecuea quea jea nee nee. Jamajjeya eya miquiana nijje ba'e majje quea bihui nee poaje. Cuanaya miquiana nijje nequi majje eya manoj'e'yo pojja'a. Jamatii, jamaya quea pame nee miquianaya ecuea quea jea nee poanijo.

⁴Ecuea eba miquiaaya ecuea esohui etehue'yo jayojja jama aje'yo. Jamajjeya eyaya miquianajo jama huohuiaña ba'a: —Jesosaja epeeji cuana Conitojo ba'eya ecuea esohui etehue'yo jayojja jama acani —eya poani.

E'e, miquianajo eya quea bihui nee poani. Pea cuaa eya quea nee nee po mee cani Jesosa nijje jjapeequianijo. Jamatii eya quea bihui nee nee poani miquiana quea pame nee nee poanijojo.

⁵Ecuea epeeji Conitojo ba'e, eyaya miquianaya huohuije ecuea eba'ejjijo pea meshijo. Eya Masenonia meshijo nequi pea cuaa napa majamaja canaje, niñeba majamaja canaje pea'ai. Jamajjeya eya quea ajjajja poanaje. ⁶Jamatii Eyacuiñajjiya ojaya epeeji quea yeno nee nee poajo jaahuana cani. Jamajjeya ohuaya Tito huoojea ca'yonaje e quea bihui po mee'yojji. ⁷E'e, Tito ba majje eya quea bihui nee poanaje. Ohuaya miquianajo huohui canaje quea pame jama ba'a: —Pabo, Jesosaja epeeji cuana Conitojo ba'eya eya, Tito, jaahuana ca'yonaje quea pame nee. Miya ojjañaja quea jea nee poani, Pabo. Yahuajo onaaya esohui huohuijji nisho shajja'ajja canaje. Jamajjeya miya quea yeno poanajejo, miquea epeeji cuana pea'ai quea yeno poanaje. Miya ona nijje quea bei po mee o'oya sa acani cuaa —jamaya Tito poanaje.

Jamajjeya miquianaya ejo jjashahuabaquianijo, eya quea bihui nee poani.

⁸Yahuajo eyaya pea tehue'ya poa quea tecue. Ma esohuijjoya miquianaya quea yeno poanaje. Quea camaja nee ma esohui etehuejji poanaje, miquiana tecueajji. Jamatii, ma etehue'yojo miquianaya quea yeno po tiitii ajja. ⁹E'e, ma esohui etehue'yo ba majje miquianaya quea yeno poanaje. Quea yeno po majje miquianajaya mimishi pajea'yonaje. Esohui huohuijji nishoja esohui sijje shajja'ajja pajea'yonaje pea'ai, miquianaaya. Jamajjeya miquianajo eya quea bihui nee poani. E'e, quea yeno poanajejo, Eyacuiñajjiya miquianaya ba'e meesahua ca'yonaje quea pame nee. Jamaya quea pame nee miquianajo. ¹⁰Dejja cuana quea mimishi poani Eyacuiñajjiya quea yeno po mee cani oja

mimishi pajea'yojji. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeeji cuana quea yeno poani mimishi amajje. Jamatii Eyacuiñajjiya oya cuana quea nee nee po tiiti mee caje'yo mimishi pajea sa po'yo ajjajojo. ¹¹E'e, Eyacuiñajjiya miqúanaya quea yeno po mee ca'yonaje. Quea yeno po majje miqúanaya quea pame nee poani. Shajjama' cuana, mimishi cuana miqúanaya nije nequi. Ojaya mimishi cuana cajaa ña miqúanaya. Oya miqúanajaya epee'yojji pojjeama; miqúanaya onaya jayojja jama po ajja. Quea que ne poanaje pea'ai esohui huohuijji nisho cuana nije e sijje ajjijojo. Miqúanajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi cuana a sa po'yo ajja. Cuanaya enije jjapee neinei qui sa poani, quea bei. Miqúanajaya Eyacuiñajji quea boti nee poanijo esohui shajja'ajja o'oya sa poani. E'e, miqúanaya quea ja'a jjashahuabaquianajo, ecuea eba miqúanaya mimishi poani nije jjapeequi'yo ajja. Jjabahuejjaqui meesahuaje'yo Jesosa nije ejjapeequijji. Jamaya quea pame nee.

¹²Jamajoya eyaya yahuajo esohui tehue majje miqúanaya huasijje huoojeanaje. Eyaya maya esohui tehuenaje miqúanaya jjashahuabaqui meejji jama ba'a: —E'e de, Pabo Eyacuiñajjiya huoojea'yo esohui huohuijji. Oya ecuanaja quea jea nee. ¡Oja tehue jayojja jama ejja'aqui o quea bihui pojji! —jamaya miqúanaya jjashahuabaquinaje.

Maya esohui eyaya tehuenaje dejja quea mimishi cuana tecueajji. Ma dejja cuanaja mimishijo pea cuana quea yeno poanaje. Eyaya ma esohui tehuenaje dejja quea yeno ani cuana yeno'ama po mee'yojji pea'ai.

¹³Jamajjeya ecuea etehue'yo ba majje miqúanaya quea ja'a jjashahuabaqui o'oyani. Jamajjeya eya quea bihui nee poani.

Yahuajo miqúanaya nije mimi jjimahuajo Tito quea yeno jjashahuabaquinaje jama ba'a: —Jesosaja epeeji cuana Conitojo ba'e quea mimishi jea nee nee.

Jamatii miqúanaya nije mimi majje Tito quea bihui nee poanaje. Jamajjeya eya quea bihui nee poanaje Titoja esohui shajja'ajja majje miqúanajajo ohua huohui cajje. ¹⁴Yahuajo eyaya oya huohuinaje jama ba'a: —Tito, Jesosaja epeeji cuana Conitojo ba'e minije jjapeequije'yo. Miquea esohui shajja'ajja caje pea'ai —eyaya anaje.

E'e, ecuea esohui Tito nije jayojja jama a'yonaje miqúanaya. Jamajjeya miqúanaya quea pame anaje; eya bicho'ama miqúanajajo. ¹⁵Miqúanaya huasijje poqui jjimahuaja miqúanaya Titoja quea boti nee pishana. Miqúanaya que poqui majje miqúanaya ojaya quea boti nee nee. Oya quea bihui nee nee pea'ai. E'e, miqúanajajo jama poani ba'a: —E'e, Jesosaja epeeji cuana Conitojo ba'eya ecuea esohui shajja'ajja canaje quea jaji nee. Ohuaya ojjaña ecuea esohui shajja'ajja neinei canaje eya etecuea poajeya jjejojo. Ecuea esohui jayojja jama a sa poanaje —Tito poanaje.

¹⁶E'e, ecuea eba miqúanaya ecuea esohui jayojja jama poaje. Jamajjeya eya, Pabo, miqúanajajo quea bihui nee poani, de.

¡Jesosaja epeeji cuana ba'e meesahuacue!

8 ¹Ecuea epeeji cuana Conitojo ba'e, jjeya eyaya miquianaya huohuije Jesosaja epeeji cuana Masenonia meshijo ba'ejo. Eyacuiñajjiya oya cuana ejjeshejji quia meesahua canaje Jesosaja epeeji cuana Jodea meshijo ba'e yasijje equiajji. ²E'e jojo nei quea camaja nee nee onajaya eba'ejji, Masenonia meshijo ba'aja. Aema' cuana poanaje. Jamatii onaaya ejjeshejji quia canaje quea bihui nee Jesosaja pea epeeji aema' nei cuana ba'e meesahuajji. Quea bihui nee nee poanijo quea huiso quia sa poanaje. ³Ecuea eba oya cuana aema' poanaje. Jamatii ejjeshejji quia canaje. Quia majje quea camaja, aema' nei poanaje. Ecuea oya cuana huohui jjima ejjeshejji quiajji, pea cuana ba'e meesahuajji. Chojja. Jamatii quia canaje. ⁴Oya cuana enijje mimi majamajanaje jama ba'a: —¡Ecuanaja ejjeshejji dojocue! ¡Quiacue Jesosaja epeeji cuana Jodea meshijo ba'e yasijje ona ba'e meesahuajji! Jamaya ecuaña a sa neinei poani —poanaje Jesosaja epeeji cuana Masenonia meshijo ba'e.

⁵Eya jjashahuabaquinaje jama ba'a: —Onaaya ejjeshejji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajjiya esohui jayojja jama poaje'yo. Cuanaya ojjaña ecuanajaya aquiana ojaya poani —jamaya oya cuana poanaje—. ¡Ecuana huohucue Eyacuiñajjiya ejjashahuabaquijji! Miquea esohui jayojja jama ecuaña poaje'yo —jamaya Jesosaja epeeji cuana Masenonia meshijo ba'eya huohui canaje.

⁶E'e, quea ja'a nee acanaje. Jamajjeya eya Tito nijje miminaje jama ba'a: —Tito, ¡Jesosaja epeeji cuana Conitojo ba'e yasijje poqui o'oyacue! Yahuaajo miya ona nijje miminaje ejjeshejji Jesosaja pea epeeji cuana huasijje equiajji, ona ba'e meesahuajji. Jamatii ejjeshejji huoojea jjima. Jamajjeya ¡jjeya ona nijje mimi o'oyacue ejjeshejji equiajjijo! ¡Jama acue ba'a: “Jesosaja epeeji ba'e meesahuañajo miquianaya quea pame nee poani Jesosajo” jamaya acue, Tito! —eyaya Tito huoojeaña ma esohui huohuiya.

⁷E'e epeeji cuana, miquianaya quea pame nee poani jama ba'a: Jesosaja esohui jayojja jama poani. Miquianajaya esohui Jesosajo quea pame pea'ai. Miquianajaya eba quea huiso esohui Jesosaja. E'e jojo nei quea ja'a nee jjashahuabaquiani pea'ai. Eya miquianajaya quea jea nee poani pea'ai. Jamatii jjeya Eyacuiñajjiya miquianaya ejjeshejji quia meesahua cani Jesosaja epeeji Jenosanenajo ba'e yasijje ona ba'e meesahuajji. Jamaya quea pame pea'ai. Onaa napa cajje oya cuana aema' nei. Napa huicha'a huicha'a canaje cuana Jesosaja epeeji poanijojo. ⁸Ecuea Tito miquiana que huoojea jjima ejjeshejji quia meeya. Chojja. Jesosaja pea epeeji cuana jamatii ejjeshejji quia canaje quea bihui nee. ¿A'a miquianaya onaya jayojja po sa poani pea'ai? ¿A'a miquianaaya quea pame nee aje pea'ai? ⁹¡Jashahuabaquicue Jesosaa miquianaya quea pame nee nee acanaje! Jama ba'a: Jesosa ba jjimahuajo

miquianaya aema' jayojja poanaje. Jamatii ohuaya, Jesosa Quitohua, esejaya Emeshi Mese neiya miquianaya ba'e tiitii mee caje'yo onijje eyajo quea ja'a nee nee. Dejja cuana huasijje poe jjimahua Jesosa ba'e'yonaje eyajo quea ja'a nee nee. Meshi yasijje poe majje ca ca dejja cuana jayojjaya poanaje, aema' pea'ai. Jamaya oya poanaje miquiana ba'e tiitii mee'yojji eyajo.

¹⁰Jamajjeya miquianaya ejjeshejji quiajjijo eya jama poani ba'a: Oe shequiaja yahuajo miquianaya ebionei jjashahuabaquinaje ejjeshejji aema huasijje equiajji. Pea cuana jjashahuabaqui jjimahuajo miquianaya quia sa poanaje. ¹¹E'e, miquianaya ejjeshejji quia sa poanaje. Jamajjeya ijje miquianajaya ejjashahuabaquijji yahuajo jayojja jama acue! ¡Miquianajaya aquiana quea huiso yanijo quea huiso quiacue pea'ai! ¡A'a quea bejjo nahue pojji! ¹²Aquiana quia sa poanijo, Eyacuiñajji quea bihui nee poani e'aquiana mese nijje. Ojaya Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajjija eba esejaya aquiana quea huiso pojja'a, oe pojji pojja'a. ¿A'a aquiana cuana miquianajaya quea nahue? ¹³Onaa napa cajje aema' nei nei ani quea camaja. Oya cuana miquiana aquiana quiajje aema' nei ep'o'yojji pojjeama. Ma aema huasijje quea huiso aquiana quia majje miquianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuabaquiani jama ba'a: —Oe Jesosaja epeejjija aquiana cuana quea huiso poajo epeejji aema huasijje iye huiso quia majje chama' aema' poaje.

Jamaya eyaya amee sa aña. ¹⁴Jjeya nei miquianajaya aquiana quea huiso. ¡Jesasaja epeejji aema huasijje quiacue! Quia majje oya cuana aema' pojjeama poaje. Quea ja'a ba'eje'yo. Quijje miquianaya aema' poajo, onajaya aquiana yanijo quia caje'yo miquiana huasijje pojja'a. E'e, ojjaña aquiana cuana pea cuanaja aquiana cuana oya huisoajja poaje. ¹⁵E'e, esohui etehue'yo yahuajo nei jayojjaya jama poani ba'a:

“Beca equé mese cuaa oe pojji bobi chicha canaje. Pea equé mese cuaa bobi quea huiso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobi oya huisoajjaya poanaje”.

Pabohua Tito huoojea caje Conito cuiñajji yasijje

¹⁶Eyaya Eyacuiñajji bihuiaña jama ba'a: —Eyacuiñajji, miyaya Tito jjashahuabaqui meenaje quea ja'a nee miquea epeejji cuanajo, Conitojo ba'ejo. Jamajjeya oya e jayojjaya onajo jjashahuabaquiani. Conitojo ba'e cuana quea ja'a nee ba'e mee sa acani Jesosajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

¹⁷E'e epeejji cuana, ecuea esohui etehue'yo miquiana huasijje ejjeshejji aema huasijje equiajji ba majje Tito quea bihui nee poanaje. Miquiana huasijje poqui sa poani ecuea esohui etehue'yo huohuiya. Eyaya oya huoojea jjima. Chojja, oya jamatii poqui sa poani miquiana que. ¹⁸Tito

nijje eyaya pea dejja huoojeaña, Jেসosaja epeeji pea'ai. Maya poquinaje ojjaña Jেসosaja epeeji cuana huasijje esohui Jেসosajo huohuiya.

Shajja'ajja majje ojjaña Jেসosaja epeeji cuaa huohui canaje jama ba'a: —Maaya Jেসosajo quea pame nee esohui huohui cani —acanjaje cuaa.

¹⁹Jেসosaja epeeji cuaa pea cuiñajji cuanajo ba'eya jiquio epeeji babaca canaje enijje epoquijji Jenosanena huasijje ejjeshejji aema huasijje dojosahuaa. Jamaya eya ejjeshejji dojo sa neinei poani Jেসosaja epeeji aema' poani yasijje ona ba'e meesahuajji. Jamajoya pea cuana Jেসosajo jjashahuabaquije jama ba'a: —E'e de, Jেসosaa ojaya epeeji cuana quea ja'a nee ameesahua cani. Jেসosa ca ca oe quea pame nee nee poani —poaje cuana.

²⁰Ma epeeji enijje poquianiya ohuaya ba caje eyaya e'e jojo nei ma ejjeshejji aema huasijje quiaña. Jamajjeya pea cuana ejo siajje epojji pojjeama jama ba'a: —Pabo ejjeshejji siijji pojja'a —pea cuana jamaya epojji pojjeama.

²¹E'e, eya jjashahuabaquiani jama ba'a: —Eyaya quea pame nee ejjeshejji doje. Jamajjeya ojjaña ba caje eya siipojji pojjeama. Jেসosaja eba eyaya quea ja'a nee aña.

²²Tito nijje eyaya beca dejja huoojeaña miquiana baa. Maya ecuea eba. Oya pea'ai quea ja'a nee po tiitiiani. Jেসosajo chaco cani. Jjeya maya miquiana nijje quea ja'a nee nequije. Miquianajo jjashahuabaquiani jama ba'a: —Jেসosaja epeeji cuana Conitojo ba'e quea pame nee poani. Quea bejjo nahue pojjeama, shajjama' pojjeama pea'ai poani.

²³E'e pojja'a pea cuaa huohui'ajja caje: —¿A'ya cuae Tito?

Jamajjeya joya cuana huohuicue jama ba'a: —Titohua Pabo nijjeya esohui quea pame nee Jেসosaja huohui cani. Ohuaya Pabo miquiana nijje chaco meesahua cani —huohuicue!

Pea dejjaa ma beca epeeji cuanajo huohui'ajja cajo, jama acajo ba'a: —¿Aya acuae oya cuana huoojea canaje? —acajo, joya cuana huohuicue jama ba'a: —Jেসosaja epeeji cuaa beca epeeji huoojea canaje miquiana huasijje, miquiana Jেসosajo ba meesahuaa. Ohuaya Jেসosajo huohui cani quea pame nee nee pea'ai —acue!

²⁴Jamajjeya jiquio Jেসosaja epeeji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jেসosaja epeeji cuaa ba caje miquianaya Jেসosaja epeeji quea ja'a nee poani pea'ai. Jamajjeya ojjaña ba caje ecuanaja esohui quea pame miquianajo e'e nei poani pea'ai.

Ejjeshejji Jেসosaja epeeji cuana huasijje equiajji

9 ¹Eyaya miquiana huasijje esohui etehue majamajajji pojjeama Jেসosaja pea epeeji aema' ba'e meesahuajji. ²Chojja. Ecuea eba miquianaya pea cuana ba'e meesahua sa neinei poani. Jamajjeya eyaya Jেসosaja epeeji cuana

Masenonia meshijo ba'e huohuinaje jama ba'a: —Jesosaja epeeji cuaa Acaya meshijo ba'eya ejjeshejji chicha sa acani aema huasijje equiajji. Jamaya ohuaya acanaje oe shequiaya yahuajo —jamaya eyaya pea cuana huohuinaje.

Ma esohui miquianajaya shajja'ajja majje pea epeeji cuana ejjeshejji chicha sa poanaje pea'ai Jesosaja epeeji aema huasijje equiajji. ³Jjeya eyaya beca cuana, Jesosaja epeeji cuana huoojeaña miquiana huasijje. Jamajjeya jecuea esohui ma ecua eyaya yahuajo huohuinaje jayojjaya oe acue! E'e, ma beca epeeji cuaa miquianaya ojee iyaa caje ejjeshejji echichajji, aema' nei Jodea meshijo ba'e yasijje equiajji. Jamajjeya miquianajaya ejjeshejji equiajji apoa poaje pea cuana poe jjimahuajo. ⁴E'e, Jesosaja epeeji cuana Masenonia meshijo ba'e miquiana huasijje poe'yajo, miquianajaya ejjeshejji aema huasijje equiajji apoa ajjimajo quea bicho nee nee poaje miquianaya. Eya pea'ai quea bicho poaje miquianaaya ecuea esohui jama ajjimajo. Quea bicho nee eya poaje. ⁵Jamajjeya eyaya Jesosaja epeeji beca cuana huoojeaña pea epeeji cuana miquiana que poe jjimahuajo. Ohuaya miquea ejjeshejji aema huasijje equiajji chicha meesahua caje. ¡Miquianajaya esohui yahuajo jayojjaya jama acue! Jamajjeya miquianajaya ejjeshejji equiajji quea huiso poaje, miquianajaya ejjashahuabaquijji yahuajo jayojjaya. Jamajjeya miquianaaya quea bhui nee quiaje'yo.

¡A'a quea dejja tai pojji; a'a quea nishehui pojji!

⁶¡Jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miquianajaya ejjeshejji poaje. Jjeya quea dejja tai poanijo, quea nishehui poanijo pea'ai oe pojji aema huasijje quiajo, quijje Eyacuiñajjiya oe pojji quia caje'yo miquiana huasijje. Jjeya quea huiso quiañajo ca ca, dejja tai'ama poanijo ca ca quijje Eyacuiñajjiya quea huiso quia caje'yo miquiana huasijje. ⁷Jamajjeya jashahuaba neinei quicue ache huiso miquianaya quia sa poani! ¡Quea bhui nee quiacue! E'e, ¡jamatii miquianajaya ejjashahuabaquijji jayojja jama quiacue! Eyacuiñajjiya quea jea nee ojaya epeeji cuana. Ejjeshejji quea bhui nee quia canijo, dejja tai'ama poanijo pea'ai Eyacuiñajji quea bhui nee poani. ⁸E'e, Eyacuiñajjiya aquiana cuana quea huiso nee nee yani. Jamajjeya miquianajaya quea huiso ejjeshejji aema huasijje quia majje, jamatii ohuaya miquianajaya aquiana quea huiso po tiitii mee caje'yo. Miquianaya aema' nei epojji pojjeama. Chojja. Eyacuiñajjiya miquianaya jaahuana cani. ⁹Yahuajo nei nei esohui etehue'yo jama poa ba'a: “Ojjaña joya ejjeshejji quea huiso quia tiitii canaje aema' ba'e meesahuajji quea pame nee poanaje. Jamajjeya jjeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”.

Jamaya yahuajo nei nei esohui etehue'yo poa.

¹⁰Eyacuiñajjiya eso' quia cani ojjaña huasijje quejo equecuajji. Ohuaya bobi quia cani ojjaña bobiajji pea'ai. Jamajjeya ohuaya miquiana huasijje

eso', bobi pea'ai quia majje, ¡miquianaaya aquiana cuana quiacue pea cuana huasijje! Jamaya quea pame nee. ¹¹E'e, Eyacuiñajjiya miquiana huasijje aquiana mi ba'e meeji quia caje'yo. Jamajjeya miquianaaya pea huasijje aquiana o ba'e meeji quia poquia tiitiije. Jamajjeya miquianajaya aquiana quea huiso equia'yo aema huasijje eya quiajje onaaya huohui caje jama ba'a: —Eyacuiñajji ecuana jaahuanajji quea pame nee nee poani. Ohuaya Conitojo ba'e cuana ecuana que quia meeshahua canaje quea huiso, ma ecua Pabohua huohui canaje jama acanaje —poaje quea bihui nee.

¹²Ma aquiana cuana miquianaaya Jesosaja epeeji aema' cuana huasijje quiañajo, quea ja'a nee ba'e meeña. Cuanaya ma aquiana quea huiso quiañajo, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecuana nijje —poaje.

¹³E'e, miquianaya dejja tai'ama poanijo, aquiana quiañajo quea huiso ba meeña miquiana Jesosaja epeeji quea ja'a nee poani. Jamajjeya oya cuana mimije jama ba'a: —Eyacuiñajji, miyaya miquea epeeji cuana quea ja'a nee po meeña. Miyaya oya cuana quea huiso aquiana quianaje. Jamajjeya miquea pea epeeji cuana huasijje aquiana quea huiso huoojea canaje ona ba'e meesahuajji. E'e, miquea epeeji cuaa Conitojo ba'eya huohui cani oya cuana Jesosa Quitoja epeeji cuana poani. Ecuana eba onajaya esohui e'e jojo nei poani miquea esohui jayojja jama oya cuana poanijo —jamaya pea cuaa huohui caje miquianajo.

¹⁴Jamajjeya miquianaya ojaya quea jea poanijo, Eyacuiñajji nijje mimi majje jama poaje miquianajo ba'a: —Eyacuiñajji, miyaya quea huiso aquiana quianaje ona que. Majjeya Jesosaja epeeji cuana Conitojo ba'e quea huiso aquiana quia meesahuanaje ecuana que. Ecuana quea jea ameesahuanaje. ¡Quea pame nee poanijo, oya cuana jaahuanacue! —jamaya onaya mimije Eyacuiñajji nijje.

¹⁵Eyacuiñajji esejo jashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya mique Bacua Ejja huoojeanaje ecuana jaahuanaa. Quea pame nee nee poanaje miya —jamaya Eyacuiñajji bihuiaña eyaya.

Mahuiso ecuea esohui ejjesheji equiajjijo.

Pabo esohui huohuiji nei nei

10 ¹⁻²Jjeya eyaya, Pabohua pea esohui tehueña. Eyacuiñajjiya eya huoojea canaje miquiana sohuihuohuiya. Jamajjeya ¡shajja'ajjacue mo! Jesosa Quito ese nijje quea bei poani. Jamajjeya eseya ojaya epeeji poanijo, eya miquiana nijje mimi neinei jama ba'a: —Beca sijjepojji cuana miquiana nijje mimiani ejo jama ba'a: “Pabo aje oe ecuana nijje nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pea'ai poani; poe majje, cho” oya sijje poani.

¡A'a maya siajjepojji cuana shajja'ajjajji! ¡A'a o jayojja jama mimijji! E niñebajji, eyaya miquiana tecueaje poe majje. Eya quea tecue poaje beca cuana nijje ejo quea tai jjashahuabaquianijo. Oya cuana aje oe jjashahuabaquiani jama ba'a: —Pabo Eyacuiñajjija huoojea'yo jayojja jama po ajja. Ohuaya ojaya ejjashahuabaquijji jayojja jama poani, Jesosaja ejjashahuabaquijji jayojja jama pojjeama —ejo siajje poani beca cuana.

³Chojja de. Eseyá Jesosaja epeeji cuana jiquio meshijo ba'yanijo ojjaña quea mimishi mimicuiajeañobíajea sa seya añá. Jamatíi eshahuaja epeeji cuana jayojja jama jjashahuabaquí ajja eseya. ⁴Eshahuaja epeeji cuaa onajaya ejjashahuabaquíjji quea tai jayojja jama acaní. Eya, chojja. Ecuea ejjashahuabaquíjji pojeama eyaya eshahuaja epeeji cuana mimicuiajeañobíajeaña. Eyacuiñajjija ca ca eya ojaya ejjashahuabaquíjji ameesahua caní. Jamajjeya ohuaya eya ojjaña joya quea mimishi nee poani mimicuiajeañobíajea meesahua caní. ⁵Ecuea eba Eyacuiñajjija esohuí quea ja'a nee. Jamajjeya beca cuana Eyacuiñajjija esohuí niñeba canijo, eyaya oya cuana mete mee majje mimicuiajeañobíajeaje; jjaníñebapajeaquí meeje'yo. Cuanaya beca cuana Eyacuiñajjijo quea tai jjashahuabaquiani mimicuiajeañobíajeaje'yo pea'ai. E'e, Eyacuiñajjija eya ameesahua canijo, beca cuana quea tai jjashahuabaquiani eyaya Jesosa Quitoja esohuí jayojja jama ameeje'yo. ⁶¡Miquianaaya Jesosaja esohuí jayojja jama acue! ¡Ojaya epeeji nei pocue! Majoya eyaya shajjama' cuana miquiana nijje nequí, ojjaña quea mimishi poani pea'ai tecueaje.

⁷Beca cuaa miquiana nijje nequíya e cojja ba majje huohuí caní jama ba'a: —Pabo ca'a'ama pojja'a. Sohúí sajea'ama. Eyacuiñajjija huoojea'yo pojjeama, sohúihuohuí sahua jjima pojja'a —jamaya poani e ba pishana majje.

Jamatíi ecuea ejjashahuabaquíjji Jesosajo onajaya eba pojjeama. Oya nei Jesosa Quitoja epeeji poso jjabaquiani. Cajjashahuabaquíahua jama ba'a: —Pabo pea'ai Jesosa Quitoja epeeji poani e'e jojo nei. E'e, Pabo ecuana jayojjaya jama poani —cajjashahuabaquíahua.

⁸E'e, eya bicho'ama miquiana nijje emimijji. Jama mimi majamajame eya poani ba'a: —Eya iña iquío Eyacuiñajjija esohuí huohuíjji. Ohuaya eya huoojea canaje miquiana huasíje oja sohúí huohuíya, miquiana ojaya epeeji quea ja'a nee po meeya. Eya miquiana jjabahuejjaquíanijo quea yeno po mee sa po'yo ajja. Cajaa sa po'yo ajja pea'ai —jamaya eya miquiana nijje mimiani.

⁹Eyaya miquianaya jjabahuejjaquíanijo, quea ajjajja po mee sa po'yo ajja.

¹⁰Beca siajjepojji cuana miquiana nijje nequí ejo siajje poani jama ba'a: —Pabojá esohuí etehue'yo quea sohúí ja'a poani. Emeshi meseja esohuí etehue'yo quea ja'a jayojja jama poani pea'ai. Jamatíi oya ecuana nijje nequíanijo ca'a'ama poani. Ojaya esohuí quea ja'a pojjeama pea'ai —jamaya siajje poani beca cuana.

¹¹Ma siajjepojji cuana cajjabahuejjaquíahua jiquío jama ba'a: Miquiana huasíje poquí majje jiquío ecuea esohuí etehue'yo jayojja jama eyaya aje'yo miquiana huasíje, e'e jojo nei.

¹²E'e, beca siajjepojji, esohui huohuijji nisho cuana miqiana nijje nequi mimiani jama ba'a: —Ecuana ca ca quea pame nee nee poani. ¡Ecuana oe shajja'ajjacue! —jama siajje pomeya poani.

Eya ca ca jjashahuabaqui sa po ajja jama ba'a: —Pea cuaa aje oe quea tai acani. E jayojja pojjeama onaya. Eyaya ca ca oe quea pame nee añ —chojja, jamaya eya, Pabo po sa po'yo ajja.

Ma siajjepojji, esohui huohuijji nisho cuana aje oe jama poani tii ba'a: —Ecuana ejjashahuabaquijji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojjeama jjashahuabaquiani, de. ¹³Eyacuiñajjiya ca ca eya huoojea canaje miqiana huasijje ojaya esohui huohuiya. Jamajjeya ojaya esohui eyaya huohuiaña bicho'ama miqiana huasijje. Ojjaña huasijje ca ca huohui jjima. ¹⁴E'e, miqiana huasijje esohui Jesosa Quitojo eyaya huohuinaje. ¡Bacue! Eyacuiñajjiya eya huoojea canaje miqiana huasijje esohui huohuiya. Ojaya esohui huohuijji e'e jojo nei eya. Eyaya quea ja'a nee huohuiaña. Jiquio ecue tehue'yojo eya bicho'ama.

¹⁵Cuanaya miqianaya sohuihuohuiañajo eya siajje po ajja jama ba'a: —Eya ee nei ojjaña huasijje esohui huohuijji nei quea ja'a nee. Onaya miqiana nijje chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jjashahuabaquiani jama ba'a: —Miquianaaya Conitojo ba'eya Jesosa Quitoja esohui jayojjaya jama quea ja'a añajo eya pea cuiñajji cuana huasijje esohui huohui meesahuaje Jesusaja.

¹⁶Jamajjeya miqianaya jamaya poajo eya poqui meeje pea meshi cuana huasijje esohui quea pame nee huohuiya Jesusajo, onaja esohui huohui jjima huasijje. Esohui huohuijji pea meshi cuanajo enequijo eya ona nijje enequi tiitiijji pojjeama. Iña ca jja ca poquije, de, pea cuana huasijje Jesusaja esohui huohuiya. ¹⁷E'e, yahuajo nei esohui etehue'yo jama poa ba'a:

“¡A'a jama huohuijji ba'a: —Eyaya jamatii quea pame añ. Chojja, jamaya pojjeama. Jamaya huohuicue ba'a: —Eyacuiñajjiya eya quea pame nee ameesahua cani. Jamajjeya eyaya quea pame añ —jamaya acue!”

Yahuajo nei esohui etehue'yo jamaya poa. ¹⁸Eyacuiñajji ojaya epeeji quea pame nee mimiani jama ba'a: —Jiquio epeejiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya ¡ecuea esohui shajja'ajjacue! —jamaya esohui huohuijji nisho poani onajaya quea jea e'ajji. Jamaya ca ca Eyacuiñajji boti'ama.

Esohui huohuijji nishojo Pabo quea yeno mimiani

11 ¹Deja ma ohua acanajejo jjashahuaba tiitiqianijjo esho'i jama mimijajiani, de. Jamatii ma eya anajejo mimianijjo, ¡a'a jja oe enijje quea quene pojji! ¡Shajja'ajja socue mo! ²E'e, miqianaya Eyacuiñajjiya quea jea nee nee

poanijo, ecuea quea jea nee nee poani pea'ai. E'e, eyaya miqúanaya Jesosa nijje j̄japee coo meesahuaquinaje. Jiquio ecua ejeajjiya ojaya ebacuase mimishi'ama nei huana mee sa acani jayojja jama eyaya miqúanaya Jesosa nijje j̄japeequi mee sa aña quea boejea nee, eshahua nijje pojjeama. ³Ecuea eba miqúanaya Jesosaja epeejji e'e jojo nei po sa neinei poani. Jjeya ca ca eya quea mete j̄jashahuabaquiani miqúanajo, esohui huohuijji nishohua miqúanaya quea tai j̄jashahuabaqui mee ca chana'. Jiquio ecua Edosiquiana neiya ma ecua peyo jayojjaa Ema dasia ca poa jayojja jama esohui huohuijji nishohua miqúanaya dasia ca chana'; Jesosa nijje j̄japee pajee meequi ca chana'. ⁴E'e de, miqúanaya aje oe ojjaña esohui huohuijji nisho shajja'ajjaña. Oya cuana Jesosajo siajje poani, Edojjoshahua Pamejo siajje poani pea'ai. Esohui quea pame Jesosajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'ajjaña so'o? ⁵Oya cuana ca jja ca oe Eyacuiñajjija huoojea'yo esohui huohuijji e'e jojo nei poso nequiaa aña; eya ca jja nequiaa ca oe cajaa aña. Chojja, eya ca ca iña iquio e'e jojo nei Eyacuiñajjija huoojea'yo. ⁶E'e pojja'a oya cuana mimiani quea bishaa nee. Jamatii esohui quea pame Jesosaja ecuea eba nei nei. Jamaya miqúanajaya eba. E'e, eyaya ma esohui huohui neineinaje ojjaña cuiñajji cuana huasijje.

⁷Eyaya Eyacuiñajjija esohui quea pame Jesosaja huohuinaje miqúanaya huasijje sosema'. Eyaya ecuea eba'ejji j̄jeshenaje pea'ai ecue chaco sosejje. Miquea echacojji jayojja jama poanaje eya. Jamaya miqúanaya Eyacuiñajjija esohui ba meesahuanaje. ¿A'a jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'yo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

⁸¡Bacue! Miquiana huasijje esohui huohuiañaajo, Jesosaja epeejji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miquíanaya ca ca oe Eyacuiñajjija esohui shajja'ajja majje jamatii sosequia jjima. ⁹E'e, Jesosaja epeejji cuaa Masenoniajo ba'eya poe majje ecuea eba'ejji ye canaje. Yahuajo miqúanaya nijje ba'eya eyaya miqúanajaya bobi ijja jjima: —¡Che mo oe esohui huohui sosejje! —ajjima ecuea miqúanaya. Jamaya eyaya sosema' esohui huohui poquia tiitiije quijje pea'ai.

Jamajjeya miqúanajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miqúanajaya.

¹⁰Chojja. Jamajjeya ojjaña cuaa Acaya meshijo ba'eya ba caje eyaya esohui huohuinaje miqúanaya huasijje sosema'. Jesosa Quitohua ba cani eya e'e jojo nei mimiani. ¹¹Jamaya eyaya huohuiaña miqúanaya ecuea quea jea nee nee poanijo. Jamaya Eyacuiñajjija eba. ¹²E'e, eyaya Jesosajo huohui tiitiije miqúanaya huasijje sosema'. Jamajjeya esohui huohuijji nishohua jama huohuime yajji pojjeama ba'a: —Ecuana Pabo jayojja chacochoani —jamaya e'ajji pojjeama onajaya.

Esohui huohuijji nisho nequiaa sosequianaje esohui huohui cani sosejje. ¹³Oya cuana ca ca oma Eyacuiñajjija huoojea'yo nisho poani, Eyacuiñajjija huoojea'yo pojjeama. Miquíanaya dasia cani; Jesosaja huoojea'yo esohui

huohuijji poso nequiaa año. ¹⁴E'e de, Edosiquiana nei Satanasa jama oya cuana poani. Ohuaya, Satanasa ojaña dasia cani; Jesosaja esohuidojojji quea pame nee poso acani cuaa. ¹⁵Jamajjeya ojaya echacojji cuaa miqianaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa año, de. ¡Poe o'oya majje Jesosaa oya cuana quea nee nee po mee caje'yo tii tii!

Pabo Jesosaja huoojea'yo poanijo quea nee poa

¹⁶Jamajjeya eyaya miqianaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso año, jamatii eya che shajja'ajja socue! Ma eya Jesosajo anajejo mimije so'o esho'i jama, onajaya quea jea e'ajji nisho. ¹⁷Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso. ¹⁸Jamatii quea huiso esohui huohuijji nisho esho'i jama ojaya huapa pojjeamajo, ma ohua acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho mimije. ¹⁹Miqianaya aje oe jjashahuabaquiani jama ba'a: —Ojaña ecuea eba. Eya ca ca iña jjadasia meequi ajja esohui huohuijji nisho cuana —jjashahuabaquiani.

Jamajjeya shajja'ajjaña joya esho'i jama joya ohua acanajejo mimiani pea'ai. ²⁰E'e, ma esohui huohuijji nishohua miya chaco mee cani sosema', minijje ba'yani sosema', miquea aquiana mesena'yo sa acani, miya tanacua cani, cojja cuiapojjea cani pea'ai quea bicho epo meejji. Jamatii miqianaaya aje oe oya cuana shajja'ajjaña, de. ²¹¿Apiojji acuae jja oe shajja'ajjaña? Ecuea ca ca jamaya ajjima. Jamajojya ¿a'a eya ca'a'ama poso nequiaa año, de? ¿A'a ma esohui huohuijji nisho cuana esho'i jayojja jama mimiani onaja quea jea e'ajji? E'e. Jamajjeya eya jamaya mimije pea'ai. ²²Esohui huohuijji nisho jama poani ba'a: —Ecuanaaya jja iquio Emeo dejja cuana, Emeo esohui mimiani.

¡Dee! Eya pea'ai Emeo dejja, Emeo esohui mimiani.

—Ecuana Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuanaaya etiiquiana Amajama bajjani —ma esohui huohuijji nisho poani.

Amajama ecuea etiiquiana pea'ai, de.

²³—Ecuana jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nijje. Esohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuohui poaje jjejojo. Oya cuana, cho. Jodio etii cuaa eya cuia majamaja canaje Jesosaja esohui eya ehuohui poaje jjejojo. Ma esohui huohuijji nisho pea cuanaja cuia neinei jjima. Eya beshahua nei mano'yonaje; quea

huiso mano huicha'a huicha'a'ajja'yonaje. ²⁴E'e, ojjaña ba canijo, Jodio etii cuaa eya quea huiso cuiasejja neinei'ajja canaje, ³⁹ cuiasejjame acanaje, de, huaca jee ejeapashajjajjaa. Cuiasejja majamaja canaje, me oejje huisome cuiasejjame acanaje; pea meshijo cuia, pea meshi cuanajo cuia ca iña acanaje cuaa, de. Beshahua nei ca iña mano'yonaje mo, de. ²⁵Jodio cuaa eya cuiasejja canaje acui sisiya, pea beca peejjima cuiasejjame acanaje pea'ai. Jaja canaje pea'ai meiya eya esohui ehuhui poaje jjejojo. Beshahua nei eya hui'l'yonaje, pea beca peejjima hui'lme poanaje. E'e de, bishe ai cuana jaanobiquinaje bae ai yasijje. Jamajjeya oe mecajje, oe pojjajo pea'ai eya bae aijo huepee biajje jjeejje ba'e'yonaje. ²⁶Cuanaya eya poqui huicha'a huicha'anaje pea cuiñajji cuana huasijje esohui huohuiya. Poquije beshahua nei eya mano'yonaje yohuajo ba'a: cuei quea cuejipashi neijo, siipojji cuanajo, Jodio cuanajo, Jodio pojjeama cuanajo pea'ai. Cuiñajji quea quemajo, ebiojo pea'ai dejja mimishi cuaa napa cajje eya beshahua nei mano'yonaje. Bae aijo beshahua nei hui'l'yonaje pea'ai. Jesosaja epeejji nishohua cuia cajje beshahua nei eya poquijeyo'yonaje pea'ai. ²⁷Eyaya chaco neineinaje; cahui jjima poanaje pea'ai. Quea camajajo hueahuea'yonaje. Quea mano poanaje. Quea shoe poanaje. Quea naba taja nee nee poanaje. Bobimajo mano'ajja'yonaje. Eya quea huoe nei nei poanaje, daqui mooma' poanaje pea'ai. ²⁸E'e, quea camaja ecuea eba'ejji. Cuanaya ojjaña pojjajo eya jjashahuaba majamajaquiani ojjaña Jesosaja epeejji cuana jaahuanajji. ²⁹Jamajjeya Jesosaja epeejji nei cuana quea mete, ca'a'ama poanijo, eya quea yeno nee nee jjashahuabaquiani. Oya cuana quea mimishi poajo, mimishi pajea mee sa neineiaña eyaya. Jamaya eya poanaje.

³⁰Esohui huohuijji nishohua miquianaya dasia canijo, eya camimi majamajaquiahua ecuea eba'ejjijo. Jjeya ca ca eyaya miquianaya huohuije pea esohui. Ma ba majje miquianaaya baje eya quea mete, dejja ca'a'ama jayojja jama poani. ³¹Eyacuiñajji esejaya Emeshi Mese nei Jesosaja Chii. ¡Oya cabihua tiitii cahua! Ojaya eba eya e'e jojo nei mimiani jama ba'a: Yahuajo Aneta emeshi mese poa Damasico cuiñajjijo. Ohuaya ojaya echacosahuajji cuana hoojea canaje e sa'ajja'yohua ojjaña ejiojijje, ba'yo majje e jeanobiaejaji. ³²Jamatii eya ojaya iña jjima, de. Eya Damasicojo nequi quehua poquinaje mecajje. ³³E'e, Jesosaja epeejji cuaa mei jiyoyo nequiya equi huejjajje eya jjepai aijo jjabioquajo, jeaquea ca'yonaje cuaa jjonojo.

Jesosaa Pabo jjacahuibaqui mee canaje ojaya eba'ejji eyajo

12 ¹Eya esho'i jama ma eya añajo mimi majamajani miquiana sohui huohuijji nisho eshajja'ajja poaje jjejojo. Jjeya ca ca eyaya miquianaya huohuije pea esohui, ma Jesosaa eya jjacahuibaqui mee canaje huohuije. ²Yahuajo nei quea shequiaja huiso, 14 shequiajame yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajji ca ca oe eba. ³E'e, eya pojja'a eshe ba mee ca poa.

Jjacahuibaqui mee ca pojja'a mo poa. Eyacuiñajjija ca ca oe eba. Ecuea ca ca ba jjima. ⁴Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya eba'ejji Quea Pame Nee bajjani yasijje, Panaiso bajjani yasijje. Jomajo eyaya shajja'ajjanaje esohui quea bame nee nee. Maya eyaya miqianaya huohui meemee ajja, yajja huohuime yajji jojoya. E'e, Jesosa eyajo ba'e enijje miminaje. ⁵Jamatii eya ma esohuijo mimi huicha'a huicha'a ajja esho'i jama. Chojja. Eyaya miya ba meeje eya quea ca'a nee nee pojjeama. E'e jojo nei Jesosa enijje miminaje eyajo. ⁶Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo nei. Miquiana nijje ba'eya eyaya chaco neineinaje miqianaaya banaje. Shajja'ajjanaje ecuea esohui Jesosaja esohui huohuiañajo. Jamajjeya ejo jjashahuabaquiiani e'e jojo nei miqianaya. Jamajjeya ma eya anajejo ehuohui majajji pojjeama esho'i jama, de, miqiana ejo jama ehuohui poaje jjejojo ba'a: —Pabo ca ca quea pame nee nee Jesosaja epeejji quea ca'a tii tii —miquianaaya ehuohui poaje jjejojo.

Chojja, eya jamaya pojjeama.

⁷Jamajjeya Jesosaa eya ojaya eba'ejji quea pame nee nee eyajo ba mee majje Eyacuiñajjija eya quea nee po mee canaje emanomeejjijo pojja'a. Jamajjeya eya quea ca'a tii tii ejjashahuabaquiijji pojjeama. Jiquio ecua Edosiquiana neija Satanasaja huoojea e cuiajji jayojja jama jiquio emanomeejji pojja'aa eya quea nee nee po tiitii mee cani. ⁸Eya Jesosa nijje miminaje pea beca peejjima mimime. Jama poanaje ba'a: —Jesosa Quito, eya quea nee nee nequi. ¡Che mo oe nee'ama po meecue! —eya mimime poanaje.

⁹Jamatii Jesosaa eya saja'a canaje jama ba'a: —Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee —acanaje.

Jamajjeya eya ca'a'ama poanijo quea bihui nee poani. E'e, ecuea eba Jesosaa quea ca'a nee nee poaniya eya quea ja'a nee ojo chaco meesahua cani. ¹⁰Jamajjeya eya quea nee nee poanijo, ecuea eba'ejji quea camaja poanijo pea'ai jamatii eya quea bihui nee poani. Pea cuaa eya napa canijo, mimijajianijo pea'ai, jamatii quea bihui poani. Jesosaja esohui huohuijjiyojo, jamaya dejja mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesosaa eya quea ca'a nee po mee cani.

Pabo Jesosaja epeejji cuana Conitojo ba'ejo quea yeno poanaje

¹¹Eya esho'i jama ma eya anajejo mimi majamajaje miqiana esohui huohuijji nisho eshajja'ajja poaje jjejojo. Oya cuana aje oe Eyacuiñajjija huoojea'yo esohui huohuijji poso jjabaquiiani. Eya ca ca iña e'e jojo nei Eyacuiñajjija huoojea'yo. Miquianaaya ca jja ca oe eya banaje Jesosajo chaco chaco aninaje. Jamatii ejo huohui jjima jama ba'a: —Pabo e'e jojo nei Jesosaja huoojea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'ejjijo camimiquiahua esho'i jama, de. ¹²E'e, eya miquiana nijje nequi Jesosaa eya atitií mee canaje quea huiso ma dejjaa ajjima acani amee canaje miquianajaya ebajji. Jamajoya miquea eba eya Jesosaja huoojea'yo esohui huohuijji. ¹³¿A'a eyaya miquianaya quea pame pishana anaje, Jesosaja epeeji cuana pea cuiñajjijo ba'e quea pame anaje pojja'a? Chojja. Ohuaya e ba'e meeji quia canaje. Maya eyaya jjeshenaje. Miquianajaya quia jjima. Jamatii ecuea bobijo huohui'ajja jjima. E'e pojja'a eyaya miquianaya ehuohui'ajjanaje ese jama ba'a: —¡Jesosaja pea epeeji jama sosequiameya mo che acue esohui huohuiaña sosejje! —e'anaje ese. Jamatii jamaya mimi jjima eya.

¹⁴Yahuajo eya miquiana baa poquinaje beca poquime. Jjeya eya apoa. Poquije o'oya miquiana baa. Poqui majje eyaya eba'e meejjijo mimimimi ajja poaje. Chojja. Eya miquianajaya ejjesheji sa po ajja. Miquianaya ca ca eya sa poani ecuea epeeji pojji. Jiquio ecua esho'i cuaa oja chii, ojaya enaese pea'ai bobia ajja jayojja jama eyaya miquea bobi sa ajja. Jamajjeya eya mique chii jayojja jama poanijo eya mi jaahuanajji poani. Miquianaya ca ca e jaahuanajji pojjeama. ¹⁵Jamajjeya eyaya miquianaya Jesosajo ba meesahuaje sosema'. Jamajjeya e'e pojja'a eya aema' poaje. Cuanaya eyaya quea huiso chacoje miquiana esohui ba meesahuajji. Eya pojja'a hueahueaje miquianaya jaahuanajo. Jamatii. Ecuea miquianaya quea jea nee nee. ¿Apiojji acuae eya miquianajaya quea jea pishana, miquianaya ecuea quea jea nee nee poanijo?

¹⁶Miquianajaya eba eya miquiana nijje nequi camaja'ama miquianajo poa. Chojja. Miquianajaya bobi ijia jjima ecuea. Jamatii beca cuana aje ejo siajje poani jama ba'a: —Pabo siajjepojji. Ecuana dasia ca'yonaje —sijje oya cuana poani.

¹⁷Chojja de, ecuea miquianaya dasia jjima. Esohui huohuijji ma eya huoojeanajeja miquianaya dasia jjima pea'ai. ¹⁸Eyaya Tito huoojeanaje jama ba'a: —¡Poquicue miya Conito huasijje esohui huohuiya Jesosajo! ¡Jesosaja epeeji oe dojocue minijje! —poanaje eya.

¿A'a Titohua miquianaya dasia canaje? Chojja. Ohuaya eyaya jayojjaya acanaje. Miquianaya ojaya quea jea nee pea'ai ecuea jayojjaya.

¹⁹¿A'a cuae miquianaya ecuea etehuejo jama jjashahuabaquiani pojja'a ba'a: —Pabohua aje pojja'a jja oe huohui cani oya e'e jojo nei Jesosaja huoojea'yo esohui huohuijji. Ecuana Jesosaja huoojea'yo nisho poani —a'a jamaya miquianaya jjashahuaba taiquiani?

¡Bacue oe! Eyacuiñajjija eba eya Jesosaja esohui jayojja jama e'e jojo nei huohuiaña. Epeeji cuana, miquianaya ecuea quea jea nee. Jamajjeya eyaya ojjaña aña miquiana Jesosa nijje quea ja'a nee ejjapeequi meesahuajji.

²⁰Jjeya eya poquije miquiana baa. Miquianajo quea yeno jjashahuabaquiani jama ba'a: —¡Dee! E'e pojja'a quea mimishi poani o'oya: Jjamimicuijaja nobiajeaquiani, onaja aquiana jea ba cani, quea quene nee nee poani, quea aquiana nahue poani, quea nishehui poani, mimijajiani, pea cuanajo maimaiani, oya jjeshe sa pojji pea'ai jjejojo mimiani, quea shajjaquijjo,

shajjama' poani pea'ai pojja'a —jamaya eya jjashahuabaquiani miquianajo, Conitojo ba'e cuanajo.

Miquianaya jamaya poajo eya quea yeno nee nee poaje. ¿A'a miquianaya quea yeno poaje miquianajaya mimishijo eya tecueajje? ²¹E'e, miquiana quea mimishi poani ba majje eya quea tecue nee nee po chana'. Eya quea yeno nee, quea bicho poaje miquianajo. E'e pojja'a eya paje miquiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miquianaya poanijo, eya quea yeno nee nee poaje ba majje.

13 ¹Yahuajo eya miquiana huasijje poquinaje becanejjijji pea'ai poquime poanaje. Jjeya eya poquije o'oya miquiana baa. Jamajjeya ¡bacue! Eyacuiñajjija esohui yahuajo etehue'yo jama poa ba'a: “Oe deja peajo maimaiani ja'a shajja'ajjajji! ¡Becaa, pea beca peejjima oya jayojja huohui cajo, shajja'ajjacue!”

Jamaya tehue ca poa yahuajo nei.

²Jamajjeya jjeya eya miquiana huasijje poquije o'oya pea beca peejjima poquime epojji. Yahuajo miquiana nijje nequiya eyaya huohuinaje jama ba'a: —Ojjaña joya quea mimishi po tiitiiani, joya jjeya nei quea mimishi poani pea'ai eyaya tecueajea neineije poe o'oya majje —jamaya eyaya jjeya miquianaya huohui o'oyaña.

³E'e, Jesosa Quitohua eya huoojea canaje miquiana huasijje ojaya esohui huohuiya. Ohuaya eya huoojea caní miquiana jjabahuejjaqui meejji pea'ai. Joya miquiana nijje ba'e quea mimishi poani tii tii quea nee nee po mee caje'yo, ohuaya. ⁴¡Bacue! Dejjá maseya Jesosa yahuajo nei acui ecueata'apeejo me cacajea caje oya mano'yonaje. Jesosaja ca ca oya cuana jeabichajea jjima. Jamatii Eyacuiñajjiya quea ca'a nee nee poaniya Jesosa shequi mee ca o'oyanaje; quea ca'a nee nee ba'e tiitii mee caní. Yahuajo Jesosa ca'a'ama jayojja poa. Jamaya pea'ai eya ca'a'ama. Jamatii Jesosaa eya quea ja'a nee ojaya esohui huohui meesahua caní miquiana jjabahuejjaqui meejji.

⁵¡Jjashahuabaquicue! ¿A'a Jesosaja esohui jayojja jama aña miquianaaya? Jesosa Quito miquiana nijje yani. ¿A'a miquianajaya ba jjima? Jesosa miquiana nijje pojjeama ca miquianaya ojaya epeejji nishojo, de. ⁶Eya ca ca iña Jesosaja esohui huohuijji e'e jojo nei. ⁷Jamajjeya eya Eyacuiñajji nijje mimiani miquiana mimishi pajea meesahuajji jama ba'a: —Eyacuiñajji, ¡miqua epeejji cuana Conitojo ba'e mimishi'ama nei ba'e meesahuacue! —eya poani.

Eya jama jjashahuabaqui ajja ba'a: —Jesosaja epeejji Conitojo ba'eca mimishi'ama ba'e ba majje pea cuaa eya bihuia caje, esohui huohuijji nei —jamaya eya po ajja.

Chojja, miquianaaya eya Eyacuiñajjija huoojea pojjeama poso aña; esohui huohuijji nisho poso aña; jamatii eya Eyacuiñajji nijje mimiani miquianaya

ojaya epeeji quea ja'a nee eba'e meesahuajji. ⁸E'e, dejjaja Eyacuiñajjija esohui e'e nei ehoojea pajea mee'yojji pojjeama ojjaña huasijje. Jamajjeya ecuea esohui e'e jojo nei, sijje pojjeama. ⁹Jamajjeya miqianaya quea pame, mimishi'ama ba'e ba majje eya quea bihui nee poaje. Jamajjeya miqianaya etecueajji pojjeama, jamatii tecuea jjimajo eya Eyacuiñajjija huoojea'yo quea ja'a nee pojjeama poso año. Jamajjeya eya Eyacuiñajji nijje mimiani miqianajo jama ba'a: —Eyacuiñajji, ¡miquea epeeji cuana quea ja'a nee nee ba'e meesahuacue oe! —eya poani.

¹⁰Jamajjeya miqiana huasijje poqui jjimahuaa eyaya esohui tehueña miqianajaya mimishi epajea'yojji. E'e, eya Eyacuiñajjija huoojea'yo esohui huohuijji, miqiana jjabahuejjaqui meejji. Eyacuiñajjija eya huoojea jjima miqiana janobajjima nei tecueajjea quea yeno nee nee epo meejji. Chojja, ohuaya eya huoojea canaje miqiana quea ja'a nee ba'e meesahuaa. Jamajjeya mi ba majje eyaya miqianaya etecueajjeajji pojjeama mimishi'ama ba majje.

¹¹Mahuiso ecuea esohui.

Esohui oe yejje nei etehue'yo

Ecuea epeeji cuana, ¡quea bihui nee pocue! ¡Shajja'ajjacue ecuea esohui! ¡Jama acue! ¡Jashahuaba neineiquicue quea ja'a nee nee eba'ejji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjiya minijje ani tiitijje'yo. Miqianaya ojaya quea jea nee nee. Oya ca ca oe quea bei nee nee.

¹²¡Ojjaña Jesusaja epeeji nijje mimicue quea bei!

¹³Ojjaña enijje nequiya miqianaya huohui'ajja cani jama ba'a: —¿Achajja acuae nequiana so'o? —onajaya ebajji.

¹⁴¡Esejaya Emeshi Mese nei Jesosa Quitohua miqianaya cajaanahua cahua! Eyacuiñajjija miqianaya quea jea nee. ¡Onijje caba'e tiitii mee cahua! ¡Edojjoshahua Pame miqiana nijje cajjapeequiahua tii tii!

Mahuiso. Eyaya, Pabohua jiquio esohui tehue'yonaje. Apoa.